

ÈKÈLEEZÌYÀ NEÀYE KUMPÀLÀ KWÀ DIKÈNGA DINÈNE ANYÌ?



Twinyikàayi mitù yètù bwà katancì kakesè cyanààna mpindyewu bwà mwàkù wà disambila.

² Nzambi Mutàmbe Cijila nè Mwakàne, tudi baswè kuKusàkidila bwà bwimpè Bwèbè, bwalu mbwimpè kutàmba nè mwoyi kutùdi. Nènku tudi tulòmba bwà Wèwè kutwilanganakù neetù dilòlò edi mu mùshindù wà pabwàwù menemene, nè kutùpèesha mabènesha Èbè. Tùmonàkù cyanza cinène cyolola cyà Musùngidi wetù wa dinanga, bwà kukwàcila babèedi nè beena ntàtu mudimu. Nè bwà kwakidilakù aba bàdi bazengèle mu njila wa mpèkaatù, dilòlò edi abu. Bwà kubàbiikila ku nzùbu wa Taatù kùdìbo nè cyà kwikalakù aku.

³ Tudi baswè kuKulòmba bwà kuvùlukakù aba bàdi bapàmbùke mu njila mubùmbàkàne nè mubùlàkàne, bwà bààmòna pààbò mwà kwalukila kàbidì ku bwobùmwe bwà Taatù.

⁴ Nènku tudi tulòmba, dilòlò edi, Mukalenge, bwà Wèwè kukàngulakù macì à bantu, bwà kutèeleja Èvànjeeliyò, nè bwà Wèwè kutengula mishikù yà mwakudi. Nènku twàngaciibweku ànu ku mudimu bwà butùmbì Bwèbè. Nènku ku ndekeelu kwà disangisha edi, patwayà ku mbanzà yètù mishiilèshiiàngàne, swàkù bwà twàmbè mùvwà bàvwà bàfùminà ku Èmawùsè abu nè: “Myoyi yètù kayìwà yilàkuka kapyà munda mwètù, pàvwàYe wàkula neetù mu njila apu anyì?” Bwalu tudi tulòmba nùnkù mu Dìna dyà Mwan’Èbè, Mukalenge Yesù. Amen.

⁵ Ndi njinga kubalakù ndambù mu Mifundu dilòlò edi, nshapità wa 17 wa Luukà Munsantu, nè kubangila ku mvensà wa—wa 26.

Nènku ànu muàkadìbi mu matùkù à Noà amu, ke muikalàbi kàbidì mu matùkù à Mwànà wa muntu.

Bàvwa bàdya, bàvwa bànwà, bàvwa bàsèla bakàji, bàvwa bàsèleshiiibwa, too nè mu ditùkù dyàkabwelà Noà mu bwàtù, nè mvùlà yà cipùpu kulwayi, nè kubàbùtulayì bònsò.

Byà mwomùmwè kàbidì ànu nè mùvwàbi mu matùkù à Lotà; bàvwa bàdya, bànwà, bàsùmba, bàsùmbisha, bàkùna, bàvwa biibaka;

Kàdi ditùkù dimwèdimwè dyàkapàtukà Lotà mu Sodomà... kapyà nè soufre kulòkabì mu dyulu, nè kubàbùtula bònsò.

*Ke mwènzekàbí mene mu ditùkù dyàbuuludiibwà
Mwànà wa muntu.*

⁶ Nènku bwà cyena-bwalu, ndi njinga kwangacila mu Genèsè, nshapità wa 19 ku—ku mvensà wa 22.

*Lwijàkàjà wèwè, nè lwàkù apa; bwalu ncyèna mwà
kwenza bwalu nànsha bùmwe to too nè pawàlwà aku.*

⁷ Mu dindà emu, mvwa ngàakula bwà manyooka àcilwalwà, nè dilòlò edi ndi muswè kutùngunuka. Tudi mwà kuumvwa mpeepèlè yà luuyà lukolè yà cilumbulwidi cidi cyènda ciseemena cyà Nzambì wa Bukolè bwònsò. Patùdi tubanga kuumvwa bintu ebi apa, mbyà mushinga kutùdi bwà kutàngilakù mu mùshindù kampàndà mwaba wutùdi nè mwoyi, nè díbà ditùdi tucìlamù.

⁸ Nè kùkaadi cikondo kampàndà, cìvwa ndyèsè dyànyì dyà kwendakana mu Inde. Nènku ànu kumpàlà kwà mèmè kulwa mu Inde, bàakapeta dikanka dinènè dyà buloba adi. Nènku mvwa mbala mu bibejibèji mu Inde, nè mùshindù wùvwà matùkù matwè ku àbidì kumpàlà kwà dikanka dyà buloba adi kulwadi, bàakamwèka bu nè bàvwa bamanyè nè cintu kampàndà cìvwa cibì, tunyuunyi tukesè tònsò tùdì túsòmbela mu mitanta yà nzùbù minène, nè túsòmbela ku bimanu binène byà mabwe abi. Myaba yàbùngì mu Inde yidi nè bimanu byà mabwe. Nè tunyuunyi tukesè tònsò tùvwà nè maswa àatù mu yòyi mitanta ayi, twàkumuka mu bimanu amu. Nè bimunà byònsò bìvwà pa ciibidilu bisanganyibwa mu nyùngulukilu wa nzùbu minène ayi, mu mapingaja, mu dilèjì, nè lwà ku nyùngulwilu wa bimanu binène byà mabwe abi; munda mwà matùkù matwè ku àbidì kumpàlà kwà dikanka dyà buloba adi, nyama yònsò eyi nè nyuunyi mikesè yàkapàtuka kuya munkaci mwà budimi bwà kiimanyinamù.

⁹ Nudi numòna's, kùvwa cintu kampàndà pa bwalu abu, cyà nè Nzambì ùvwa ùkùba tunyuunyi Twèndè tukesè atu nè nyama Yèndè ayi. Nudi bamanyè's, Nzambì umweumwe uvwa mubalombole mu bwàtù awu, mu matùkù à ku cibangidilu awu, paakabutudiibwàbo ku màyi apu, ku diyiiisha dyà Noà, Nzambì umweumwe awu ùcidi ànu nè mwoyi nè ùkòòkesha leelù ewu, nè Yèyè ùdi nè bukòntononyi Bwèndè bwà bifùkiibwà Byèndè.

¹⁰ Nènku mvwa ndyàmbidila nè: "Piìkalàbi nè Nzambì ùvwa mutàmbe kucyùka tunyuunyi Twèndè tukesè atu, nè bimunà Byèndè nè mìkòòkò, bwà kubisemeja kule kumpàlà kwà dibùtudiibwa kulwadi, ambààyaaku tũng mwàtàmbye kucyùka bàna Bèndè bàdi balediibwe kùdì Nyumà Wèndè, basukula mu Mashì Èndè. Yèyè ùdi ùbacyùka." Nènku bu mwàkadimwijàYe tunyuunyi tukesè bwà kupàtukatù mu bisòmbedi byàtù, ndi ngiitabuuja bulelèlè nè Yèyè ùdi ùdimwija bantu Bèndè, leelù ewu. Bu mutùdi tumòna bimanyinu binène byà Dilwa Dyèndè pabwipi apa, ndi ngiitabuuja nè Nzambì ùdi

ùdimwija bantu Bèndè bwà kudisangishabo, nè dibiikila dinène bwà kupátuka mu ditùkù dyà ndekeelu edi.

¹¹ Cyena-bwalu cyànyì dilòlò edi cidi nè: *Èkèleeziyà Neàye Kumpàlà Kwà—Kwà Dikènga Dinène Anyi?*

¹² Mpindyewu dîbà dikaadi diyè kupîta munùdì nwênù nwela meeji amu. Dîbà dikaadi diyè bikolè be, mu mùshindù wà nè ndi ngèèla meeji nè dîbà dikaadi dimanè kupîta bwà mu Àmèrikè emu. Tukàadi ànu ku ndekeelu kwà njila. Nènku mu dindà emu, pâmvwà nyiisha pa Baabùlònà nè ngiikadilù yèndè apu, mwà mwele meeji nè mbifwànyine kwikala bimpè menemene dilòlò edi, bwà kubweja bàmwè bàà mu Bible, bwà kuleeja mùshindù wutùvwà pabwîpì nè Dilwa dyà Mukalenge. Nènku tudi mwà kumòna, twètù nè disù dyètù dyà mubidi nè, cintu kampàndà cidi pabwîpì nè kwenzeka.

¹³ Kùdi di—ditàcishiibwa dinène munkaci mwà bantu, mbikolè bwà kuteeta kwenza ditàbuluja. Èkèleeziyà mmishiilàngàne bikolè, nè ewu nè mukwàbò mmipyàngàne mu maminu, bwà mikàlù yà cyena-màngumba. Nè beena Kilistò mbatàmbe kwikala babindùlùke, mùdibi bimwèka, nè basalùke. Kàdi, nudi bamanyè's, mbyà bikèmesha's, kàdi Mukalenge wetù wàkamba nè: "Pàabàngà bintu ebi kwenzeka, bwà kubàndisha mèsù," bwà nè bupikudi bwètù bwàseemènyì pabwîpì.

¹⁴ Nènku patùdì tumòna luse Lwèndè lunène alu, bu mùdilu lùleejiibwe kutùdì, tumòna byanza Byèndè byà bimanyinu binène nè maalù à kukèma; biine abi, mèsù ètù neàtabalè, mu tusunsa tukesè emu, bwà kubandila. Nè pashiishe cidi citùpèèsha disàmbiibwa dyà kadiyì tuseku edi, bwà kumanya nè Nzambì wa Bible awu ùcidi ànu nè mwoyi leelù ewu. Nè Yèyè mmunangè bàna Bèndè, nè Ùdi ùbàpèèsha didimwija. Nè aba bàdì nè meeji à nyumà abu, bàdì bàpátuka.

¹⁵ Nènku tudi tumòna nè, mu matùkù àvwà Yesù wàkula awu, Yèyè wàkamba nè: "Ànu mwàkadibi mu matùkù à Noà, nè mu matùkù à Lotà."

¹⁶ Mpindyewu, ku ndungilu yònsò wa cikondo, Nzambì ùtu misangu yònsò ànu ufila dibiikila dyà luse kumpàlà kwà dibiikila dyà cilumbulwidi.

¹⁷ Mpindyewu nwênù biikàle balongi bàà maalù-malonda, nè mèmè mwà munkaci mwà kulonga maalù-malonda lumingu elu, nè mbingu yibidi anyì yisàtù mishààle eyi, baataatù Bàà Kumpàlà Kwà Nicée, bàà bwalu-bulonda bwà kale bwà èkèleeziyà pabwîpì menemene nè Nsangilu wa Nicée, nè pashiishe bàvwà munkaci mwà kwenza èkèleeziyà wa Kàtòlikè mu bidimu cinunu nè nkàmà yitaanu byà bikondo byà mîdimà. Nè ndi mmòna nè mu mifundù yà Nicée ayi, anyì Nsangilu wa Kumpàlà kwà Nicée awu, bwà nè bàvwà munkaci mwà kwenza cintu ànu cìmwècìmwè citùdì twenza leelù ewu eci. Kaa, mùshindù mwinè wùdibi byènzekululà's wè!

18 Nè pa kumòna ngiikàdilù wa èkèleeziyà, nè ngiikàdilù wa bantu, nè bimanyinu byà bikondo, mbifundiibwe myaba yònsò.

19 Mpindyewu, kumpalà mene kwà Nzambi kwenza Yè ní ncinyi cyònsò, mu ndungilu yònsò wa cikondo, Yèye utu misangu yònsò ànu útuma luse, mwanjèlò, mupròfetà, Mukenji. Nè misangu yònsò, nànsha nànkù, byònsò bitu ànu bidyombòdìibwe. Èkèleeziyà kî mmuswè kuWàkidila to.

20 Noà. Wàkaakula bwà Noà mwab'ewu. Nè wàkayiisha bidimu lukàmà nè makùmi àbìdì. Kàdi nànsha mùvwà mukenji wèndè mwikale luse amu, bantu bààkapanga kutèya ntèmà ku dilongesha dyèndè. Cìvwa ncintu kampàndà cìvwà nè cyà kubàsùngila, kàdi nànsha nànkù kabàvwa baswè kutèeleja to. Kàdi aci cyòci kaciyi cimfwànyì cilenga cyà bikondo byà leelù ebi's wè!

21 Mpindyewu, udi mufwànyine kungambila nè: "Mwanèètù Branham, mmunyi mùdi mwà kwamba nè 'ncilenga,' nè utùzòlela cimfwànyì cyùdi munkaci mwà kutùzòlela eci?"

22 Mbilenga bwalu Mukalenge Yesù ùlwalwa kàtààtakà bwà Èkèleeziyà Wèndè, nènku cidi mmeeji matàmbe bulenga àkaadiku kacya cìfùkìibwà cyà Nzambi cyelekù's; bwà kupàtuka mu cimvundù cinène eci nè kubwela mu Butumbi Bwèndè bubèneshiibwe, mwikalà mununu mwà kwikala nsongà, nè mubèèdi mwondòpiibwe bwà kashidi. Kakwàkwikala kàbìdì tunyinganyinga anyi màsaamà à mwoyi to. Aci cyòci kaciyi cintu citàmbe bulenga cìndi mwà kwelela meeji's! Nè mùshindù mwinè wùdibi bibèneshiibwe bwà aba bàdi bindìle cikondo cyà didisanga aci's.

23 Mpindyewu tudi tusangana nè, bu mwàkaleedilà Yesù kale mu matùkù à Noà. Twánjääyi ànu kwalukila cyànyimà, bwalu Yèye wàkamba nè: "Angàtaayi cileejilu cyà ditùkù adi."

24 Mpindyewu, pàvwà Kaayinà nè Abèlè...Pàvwà Kaayinà mushipè Abèlè ke dībā adi Setè kwangatayè kaaba kèndè, tudi tusangana nè Sàtaanà ùvwa munkaci mwà kuteeta bwà kubùtula Dimiinu divwà nè cyà kulwa adi divwà Nzambi mulayè, nè Dimiinu dyà mukàjì divwa mwà kuzaaza mutù wà dimiinu dyà nyòka, nènku Sàtaanà ùvwa ùteeta bwà kubùtula Dimiinu dyà bukalenge adi, nènku kwelayè meeji nè wàkacyenza pàakashebeyàye Abèlè apu, kàdi Nzambi wàkajuula Setè pa kaaba kèndè. Cimfwànyì cilenga cyà lufù nè dibiikà dyà ku lufù dyà Kilistò, nè Dimiinu dyà Bukalenge divwà dilwa.

25 Dībā adi mbyà musinga wàbùngì bwà kumòna nè mùshindù wùvwà, ku luseke lwà Kaayinà, bàkalwa batèndeledi bàà òò. Nènku bàvwa bantu bàvwà bàyà mu èkèleeziyà; ke mùvwà kàbìdì Kaayinà muntu uvwa uya mu èkèleeziyà awu. Ùvwa ùkuukwila Mukalenge. Wàkiibaka cyoshelu. Ùvwa wa mu èkèleeziyà. Ùvwa ùfuta mabànza èndè. Yèye ùvwa, mu cibadi

cyònsò bu muntu mwà kumutàngila, bu mwena kwitabuuja mulelèlà.

²⁶ Kàdi kùdi bitùpà ànu bisàtù byà bantu, mbwena kwamba nè, beena kwitabuuja, beena bupidyà, nè beena kwitabuuja bàà budingibudingi. Kàdi's buloba bùcidi ànu bùle tètè naabò dilòòlò edi.

²⁷ Nènku Kaayinà ùvwa ànu munkaci mwà kudingidija kwitabuuja. Nè mu ndelàngànyì yèndè amu kupàtukamù musùmbà munène wà bantu bayi bàà mu èkèleeziyà, batèndeledi bàà dipòkò.

²⁸ Mpindyewu, eci ncyà citàmbe kwikala cyà pabwàci, kàdi nuvwakù bamòne nè ku luseke lwèndè aku nkwàkalwà cisà cyà cishidimùke, cilongè tùlaasà anyi? Bible ngudi ucyamba bitòòke tòò. Wàkamba nè: “Bàvwa biibaka, nè bàvwa bènza bintu binène.” Maalu à mamanya àkapàtukila mu ndelàngànyì yà Kaayinà. Nè beena maalu à mamanya banène, nè baa docteurs, nè bantu banène, bààkapàtukila mu ndelàngànyì yà Kaayinà.

²⁹ Piinè apu, ku luseke lukwàbò kùvwa ba—bapèlè, mùshindù wà baabidimè, kàdi bàvwa mbantu bàvwà biitàbùùje nè Nzambi wabò ngwa cyà bushùwà. Éyì Nzambi, wàmbadilaku mu bóbò abu's!

³⁰ Nènku ànu kumpàlà menemene kwà cikondo cyà nshìikidilu kulwaci, kùvwa cibwejàkàjì cinène. Nè luseke lunène lwà èkèleeziyà, kumwèkalù bu nè, bàvwa bacimùne, ànu mùdibi leelù ewu emu, bwà maalu à mamanya.

³¹ Nè cikwàbò cintu cinène: yèyè kwamba nè: “Bàvwa munkaci mwà kwibaka.” Kacya kakùtukù kwànji kwikala cikondo mu maalu-malonda bu mùdi diibaka dyà nzùbu diikàle dinène menemene mùdidi mpindyewu emu to. Ncimwè cyà ku bimanyinu byà cikondo cyà nshìikidilu. Kacya katùtukù banji kupeta cikondo cyà diibaka dyà nzùbu to. Nènku mpindyewu, nànsha mene mu kaacimenga kèètù kakesè aka, ncyèna mwà kupeta mwaba mukùmbàne wà kuya kalemba kàbìdi kàlulù to. Byònsò bìdi ànu macinka à diibaka dyà nzùbu; ànu diibaka dyà nzùbu nè dikùnà dyà bintu. Nènku bu twètù mwà kùkàngula mèsù ètù, ndìmwè dyà ku makunji à cimanyinu cyà Nzambi didi dìleja nè ndekeelu ùdi pabwìpì.

³² Nènku tuvwa tuyiisha mu dindà emu, pa tuzùbù tùdi tùbuuka nè mìsilè, mùshindù wùdìbo mwà kwimana mu Moscou, nè kuludikila mìsilè lwà munkaci mwà Mùsèèsù Mwinâyì mu Louisville, kàdi kabàyikù buumuke mu Moscou to. Nè yôyi neyùmbulè disòsù mu buloba, dyà ndòndò wa mètres makùmi àtaanu nè àsàtù, mu cijèngù cyà kilòmèètà nkàmà yìbìdì nè makùmi ànaayi mu nyùngulwilu wabò. Ke bunène bwikalà disòsù adi nànkù awu. Yisàtù cyanàànà mmifwànyine kubùtula buloba bujimà, kubuumusha mu mpoko wabù. Beena maalu à

mamanya, nudi numòna nè nduseke kaayi lùdici anyi? Nduseke lwà beena lwonji.

³³ Nzambi ùdi ùtèkemena bwà bânà Bèndè kuMweyemenabò bwà byònsò bidibo bàpeta. Kàdi twètù tudi baswè kweyemena cyanza cyà muntu. Mbipiciibwe nè mèmè mwikàle nè ditèkemena dyànyì diibakila mu Kilistò, ngàngata luseke lwànyì lwà kakùyi tuseku to pa ngàsà Wendè nè luse, kutàmba musumbà kanà wònsò wà bantu bàdi balongè tulaasà bàdi bafwànyine kwenza bulongolodi kampàndà, kwamba nè: “Ewu ke njila.” Kilistò wàkamba nè: “Mèmè ndi Njila, Bulelèlè, nè Bukènkè. Nè muntu nànsha umwe kèna ùlwa kùdi Taatù pàdiye kàyi mupicile kùndi Mèmè to.”

³⁴ Ki bwà cinyì, nudi mwà kumòna nè, nditùkù dinène dyà dilonga dyà tulaasà. Nditùkù dinène dyà dikokangana pa buloba. Nènku ànu munkaci mwà cyòci aci amu, bàvwa nè cyà kwikala nè buloba butàmbe bunène bwà maalu à mamanya kupita mutùdi naabu mpindyewu emu. Bààkiibaka bipaapu byà misàkà. Katwènakù nè cintu nànsha cìmwè cidì cifwànyine kwibaka cipaapu cyà musàkà to, ní nukààtukù baseemènekù pabwìpì naaci. Nkààdi mufikèku, mu Èjiipitù, nè bìdì mu Mexique abi. Nè kule, mu butùmbùke bwà masangu à njila malondangane búngiwù, mbifwànyine kwikala mabwe manène àdi mafwànyine kwikala nè bujitu bwà nkàmà yà binunu byà kilò, miibaka kuulu aku kumutù kwà nzùbu munène, wa katankù awu. Nènku mmupempà bipwàngàne mu mùshindù wà nè kakwèna nànsha mwaba bwà kapaaya kupicilamu nànsha; ùvwa mukòshìibwe nè dimanya dyà mpilù. Kaa, ditùkù kaayi dyà maalu à mamanya’s wè! Nènku, kàbìdì, ncitèèkiibwe ànu menemene munkacinkaci mwà buloba, nènku dìbà nànsha dyòdi disanganyibwa penyì, kakwènakù mundidimbì mu nyùngulukilu wàci awu to. Ndi ngèlèlè mpatà bwà nè tudikù bafwànyine kukùmbanangana naaci, leelù ewu, mu maalu etu à mamanya à cyena leelù aa.

³⁵ Kàdi Yesù wàkamba nè: “Ànu mwàkadìbi mu ditùkù adi amu, ke mwikalàbi kàbìdì ku dilwa dyà Mwànà wa Nzambi.” Mpindyewu, nè Noà wàkayiisha bidimu lukàmà nè makùmi àbìdì, kàdi, mònaayi nè, bààkamuseka.

³⁶ Mpindyewu, Yesù wàkamba kàbìdì, nè: “Ànu mwàkadìbi mu matùkù à Lotà, nè ke mwikalàbi mwà kwikala, mu matùkù à Lotà, bàvwa bàdya, bànwà, bàsèlangana, bàsèleshangana, bàkùna, biibaka, bàsùmbisha, bàsùmba.”

³⁷ Kaa, kacya kì nkwanjì kwikalakù ditùkù kampàndà, dyà, bungèndàmùshingà be, bu leelù ewu nànsha, ànu bisùmbishidi byà màshinyì mamane kwendesha búngi cyanàànà nè bikwàbò byònsò. Bipite búngi, mu mùshindù wà nè, udi mwà kusùmba frigo cidimu eci, nè kumutùdila ndola mitwè ku nkàmà yinaayi anyi yitaanu, nè cidimu cidì cilonda muntu nànsha umwe kàyi

ùmuswa to. Ûkaadi wa cyena kale. Kanwènaayikù bamòne mùyaaya neenù myandà yà bungèndàmùshingà mitàngija dyùlù dyènù ku dikwàta mudimu bu bapika anyi? Udi mwà kusumba kàshinyi cidimu eci, nè cidimu cyàlonda pàmwàpa kaciikàle ànu kimpè bu kawùvwà mwà kusumba cikondo aci, kàdi nekàjimijè ndola cinunu bwalu mbashintùlùle cijikù cyà ku radiateur anyi mbakenzèlekù cintu kampàndà cikesè cyà macimbu. Cìdi ànu diswìshà dyà bintu bìdìbo bàpàànyisha, bwà kuuja Bible.

“Ànu mwàkadibi mu matùkù à Noà, nè mu matùkù à Lotà amu.”

³⁸ Nànsha mùvwàbi nè, musangu wònsò, banjèlò bààkamwèneka, bapròfeta bààkajuuka, nè mukenji wàbò wùtu misangu yònsò ànu ngàsà, luse, nè disùngidiibwa. Mukenji wà Nzambi wùtu misangu yònsò ànu disùngidiibwa, kumpàlà menemene kwà cikondo cyà nshìikidilu; wùkenketaayi mu Mifundu, mùshindù wàkayiisha Noà disùngidiibwa. Kàdi bààkabàseka nè bààkabeèlulwila, nèbààkabàseka.

³⁹ Nènku ànu mwàkadibi mu matùkù awu amu, ke mùdìbi kàbìdi leelù ewu. Nènku paùdi upàtuka nè Mukenji, wà nè Kilistò mmubiike ku bafwè, mwàkalayàYe nè Yèyè ùvwa mwà kuDileeja patòòke. Nènku bàdi bènzela mukenji awu leelù ewu, ànu mwàkenzelàbo Mukenji mu ditùkù dikwàbò adi amu.

⁴⁰ Lotà wàkapàtuka mu Sodomà, nè wàkateeta nè mwèndè mwònsò bwà kufikisha bilongo byèndè ku ditèeleja mukenji wà Banjèlò, kàdi bààkamuseka nè kwamba nè ùvwa wèla bilèlè.

⁴¹ Kaa, cimfwànyì kaayìpu cyà ditùkù edi's wè! Paùdi ubàtwàdila Mukenji wà disùngila wà Nzambi, bàdi bàmba nè: “Udi welulwila ntèndeleele. Udi uteeta kutentula cintu kampàndà.” Musumbà wa mùshindù wùmfwèwùmfwè awu's! Ndìbà kaayì ditùdimu nè mwoyi edi's wè! “Èè, bàdi bèèla meeji nè ànu bòbò nkààyaabo ke bìikalà mwà kusùngidiibwa. Bàdi bèèla meeji nè ànu bòbò ke bàdi bàyiisha Èvànjeeliyò.”

⁴² Yesù wàkamba nè: “Bimanyinu ebi nebìfilè aba bàdi bìitabuuja.” Kì n'Dìyi dyànyì mèmè to. N'Dìyi Dyèndè Yèyè.

⁴³ Nènku mònaayi nè, ndi muswè bwà nùmonè, lùkàsàlùkàsà, nè ndiyiisha dyà mùshindù kaayì divwàdi. Kaa, eci's cìdi citùpisha mwoyi wànyì nè disànka's. Pàndi ngèèla meeji bwà Sodomà nè Gomòlà, bikaavwa bikooyike bikolè, bwà cìdi citàngila nsòmbelu mulenga, mu mùshindù wà nè bantu bakònyàngàle bàvwa myaba yònsò.

⁴⁴ Kàdi ànu pabwìpi menemene nè kabùtù kanène, kàà ndekeelu aku, Nzambi kutùmaYè mupròfeta kuntwaku. Nè ndi pàànyì ngèèla meeji ku bwalu abu, kàbìdi, Yèyè wàkatùma Mwanjèlò kuntwaku, nè ndi muswè bwà nwènù kumòna Mukenji wà Mwanjèlò awu. Abraham, uvwa mulondè njila pàmwè nè

banyààbanyà badyombola bàà Mukalenge abu, wàkasòmba mu cipèèlà mùvwà malaba màtùke.

⁴⁵ Ke Lotà kupwekayè nè kushààlaye mulombodi wa cimenga, nè yêyè ùvwa muntu munène munkaci mwà mpèkaatù. Mbiipiciibwe nè mèmè ncìyì munangiiibwe bikolè kùdì bantu to, kàdi mwikàle mu bulongame nè Nzambi. Kàdi Lotà ùvwa mumanyike bikolè, ke kusòmbayè mu misèèsù, ku ciibi cyà cimenga aci. Yêyè ùvwa nzuji wa cìvwà cifwànyine kubwela nè cìvwà kaciyì mwà kubwela. Nènku's ke yêyè awu, ùfla mwoyi wèndè mu masandi, nè mumanyè nè mu cimenga cyèndè bintu byà mùshindù awu bivwa byènzeka.

⁴⁶ Aci ní kî ncimfwànyì cyà leelù ewu's, mu ditùngà dyètù emu; ndongamu kayiyi mikenketa to, lukutukutu lwà mishindù yònsò, lwonji, lukinu! Kaa, bàvwa mwà kucisùnsula, bu bóbò baswè kucyènza, kàdi kî mbaswè kucyènza to. Kàdi kabèèna mwà kucyènza to, bwalu Nzambi mmwambè nè nebiikalè mùshindù ewu. Bu bóbò ànu mwà kukàngula mèsù àbò nè bàfika ku dyumvwa's wè!

⁴⁷ Kàdi, mònaayi nè, pabwipi menemene nè dībà dyà bwalu kashondo kulwadì. Abraham nè Sarah, bàvwa basòmbè mwĩnshì mwà mucì wà lusànga abu, dīngà ditùkù pàvwàbo pambèlu apu, Sarah wàkamòna Bantu kampànda bènda bàlwa. Nè yêyè wàkajuuka mutàngile ku ntentà.

⁴⁸ Ndishiilangana kaayipu's wè, nè bakàjì bàà ditùkù edi, nè mùshindù mwìnè wùvwàbi bifwànyine kwikala bishiilàngàne mu Sodomà mwàmwa's. Pàdì cikondo cyà bantu balùme kulwabò kumbèlu cìlwa, bakàjì bàdi bònsò bàvwàla tulàmbà twàbò tukesè twipi atu, nè bàpàtuka nè bàkakòsa mashinda. Dishiiilangana kaayi's wè!

⁴⁹ Kàdi Sarah wàkaya ku ntentà. Nè pààkenzàye nàнку, Bantu aba kulwabò. Ke Abraham kuBàtàngilayè. Bàvwa bàmwèka ànu bu nè bàvwa Bantu bàà mmwènekèlu wa pabwèndè. Nènku Umwe wa kùdìbo ùvwa ùmwèka bu Mwakudi, nènku pààkasòmbàYe nè kubanga kuyiikila nè Abraham. . .

⁵⁰ Abraham kwambayè nè: "Sòmbelàayi apa, nè nènñutwàdile ndambù wa màyi, nè nènukulèku makàsà Ènù. Nènsope dyàmpà dikesè. Nè netùdìlongòlòlè, nè Nudi mwà kudyà dibùlù dyà munyiinyi. Pashiishe Nudi mwà kutùngunuka nè lwendu Lwènu."

⁵¹ Nènku pààkapàtukàye lubilu è kubwela mu cisùmbù cyà ngombe aci, nè kusanganayè kànà kàà ngombe kàà manyi aku, è kukàshebeyayè. Kwambilayè Sarah bwà kwangatayè ndambù wa màmpà bwà kwenza tütô.

⁵² Ke kuyiikilayè nè Muntu awu. Ngèèla meeji nè, mu mùshindù kampànda anyi kansanga, Abraham ùvwa mumanyè nè Yêyè awu ùvwa Nganyì. Nènku Muntu uvwa mwakudi awu, ùvwa nè nyimà Wèndè mwela ku ntentà. Ùvwa Mùsànjeelà wa ditùkù adi.

Ke Yèyè nè: “Abraham, Nènkumwènekèlè bilondèshile mulayi, wà bidimu makùmi àbìdì nè bitaanu kumpàlà. Ndi mukwenzèle mulayi, nè Nènshaalè naawù.”

⁵³ Kaa, Dìna dyà Mukalenge dibèneshiibwè's wè! Nzambi wàkafila mulayi nè: “Mu matukù à ndekeelu, Yèyè ùvwa mwà kwicikija Nyumà Wendè pa mubidi wònsò,” nè Yèyè neàshaalè naawù. Yesù wàkenza mulayi, nè kwamba nè: “Bintu bìNdì ngènga ebi nenùbyènzè pèènu,” nè Yèyè neàshaalè naawù, bwalu Yèyè ùdi mwakàne.

⁵⁴ Ke Abraham kuMutàngilayè. Ke kwambaYè nè: “Ànu lwà pa dîbà edi mene ngondo wàlonda, bilondèshile mwoyi,” uvwa nè Sarah awu, “Nènkumwènekèlè, nè Sarah neàlèlè mwànà ùNdì mulayè awu.” Mpindyewu, Abraham ùkaavwa nè bidimu lukàmà, nè Sarah ùkaavwa nè bidimu makùmi citèemà.

⁵⁵ Nènkù Sarah, paanyimà pàà Mwanjèlò awu, munda mwà ntentà amu, wàkaditwa . . . wàkaseka.

⁵⁶ Ke Mwanjèlò awu, nè nyimà Wendè mukoma, kwamba nè: “Sarah wàsekì bwà cinyi?” Awu ùvwa Musànjeelà awu. Kaa, nudi bamanyè cìndì ngàmba aci anyi? Alu ùvwa ndubuku lwà mùshindù kaayi alu, nè nyimà Wendè mukoma ku ntentà, nè yèyè mukàjì munda amu? Nènkù kufùkishayè mimwemwe. Nè kwambaYè nè: “Wàsekì bwà cinyi?” Yèyè wàkacimanya. Nè aci cìvwa m'Mukenji wà ndekeelu kumpàlà kwà Sodomà nè Gomolà kwoshiibwabì. Mwanèètù, wèwè muWùtèèlèje, dilòlò edi, m'Mukenji wà ndekeelu mpindyewu kumpàlà kwà buloba ebu kwoshiibwabù. Nudi numòna ngiikàdilù wa Mwanjèlò awu anyi? Mwanjèlò awu ùvwa nganyi? Ùvwa n'Nzambi.

⁵⁷ Vùlukàayi nè, Abraham wàkaMubiikila nè: “Mukalenge.” Nè nkùdimwinu mwab'awu ùdi nè “Elohim, Yèhowàh munène, wa bukolè.” Ùvwa n'Yesù Kilistò mwangàtùlùle mubidi.

⁵⁸ Muntu kampàndà kwamba nè: “Udi muswè kwamba nè ùvwa . . . ? Ùvwa mukapetè mubidi awu bìshi?”

⁵⁹ Mòna's, Yèyè's wàkabiiikila ànu Banjèlò bàbìdì abu. Ke kwelaye ndambù mukesè wa mupùùya, mùshindù awu, ke tupwishipwishi nè kàlisìyumù nè binshidimba kudìsangabì, ke Ngabùdyèla kubwela mu wùmwè, nè Mwanjèlò mukwàbò mu mukwàbò. Nè wàkenza wùmwè Bwèndè Yèyè.

⁶⁰ Dìna Dyèndè dyà cijila dibeneshiibwè's wè! Ndi nè disànkà dyàbùngì, dilòlò edi, dyà kumanya nè Nzambi umweumwe wa Bukolè bwònsò awu, Udi mufwànyine kuDyènzela mubidi wà kusòmbelamù awu, dyeyemena dyànyì dìdì mu Yèyè nè, dīngà ditùkù Yèyè neàjuule ewu ku lufù, mwàkalayàYè bwà kwenza amu.

⁶¹ Nè Yèyè ùdi munkaci mwètù, munkaci mwà kwenza cintu cìmwècìmwè cyàkenzàYè kwàka aci. Kaa, Dìna Dyèndè dyà butumbi adi dītumbishiibwè's wè; ùdi munkaci mwà kutùpèèsha

didimwija, wàkula neetù, ùtwàmbila bwà kudilongolola. Mu bushùwà bwà bwalu, Yêyê wàkamba nè: “Katanci kakesè aka bàà pa buloba kabààkuMmòna kàbìdì to. Kàdi, nwènù nenùMmònè, bwalu Nèngiikalè neenù, munda mwènù mene, too nè ku ndekeelu kwà buloba.” Ndìbà kaayi ditùdì nè mwoyi edi's wè!

⁶² Mònaayi nè, Mwanjèlò wàkatwàla kapyà awu, ùvwa n'Yêyê Wàkenza cishimà aci awu. Nè twètù bònsò tudi bamanyè nè buloba nebùbutudiibwè, musangu wùdì wùlondà, ku kapyà. Nè Mwanjèlò uvwa mutùmìibwe ku Sodomà nè Gomòlà awu... Tàngilàayi nùmonè cyàkambà Yesù. Kaa, s'cìdì ànu citùpisha musùukà wànyì nè disàнка bwà kufika ku cyòci aci. “Ànu mwàkadibi mu matùkù à Noà, ke mwikalàbi kàbìdì ku dilwa dyà Mwànà wa muntu.” Cyàkenza Mwanjèlò awu ncinyi? Ùvwa nè nyumà wa dijingulula. Ke Yêyê kwamba nè: “Ànu mwàkadibi musangu awu amu, ke mwikalàbi kàbìdì pìikalà Mwànà wa muntu munkaci mwà kubuuludiibwa mu Dyulu.” Nudi nucimòna anyi? Anji elàayibi ànu meeji, nè, munkaci mwètù mpindyewu mmwimàne Mwanjèlò umweumwe wa Nzambì awu, udi kàyì mùngà muntu to ànu Mukalenge Yesù Kilistò, mu mmwènekeli wa Nyumà Mwimpè. Ùdi munkaci mwètù: “Mu ditùkù adi.” Nè Yêyê ùvwa Nzambì, nè ke cìvwa Mukenji Wèndè kumpalà menemene kwà kabùtù kulwakù.

⁶³ Mpindyewu netùmonè nè cìvwa m'Mukenji wà disùngidiibwa. Wàkapweka nè kuteeta bwà kusùngila cisàmbà, kàdi kubèngabò bwà kuMutèèleja.

⁶⁴ Nènku, leelù ewu, ncintu cìmwècìmwè aci mu ditùngà dyètù, munkaci mwà bantu bèètù. Nkààdikù mupetè dyèsè dyà kumòna Mukalenge wetù Yesù, mu masangisha, wènza bimanyinu nè maalu à kukèma nè bintu binène. Nè bulelèlè bantu bìmanà pa cibùmbà cyà ku cyambilu apa nè mbamanyè, kakùyì mpatà nànsha mikesè to, nè—nè Nzambì munène, udi kàyì mwà kufwà, udi kàyì mikàlù awu ùdi kaaba aka nè wènza cishimà cyà mùshindù wùmwèwùmwè awu; nè nèbìimane mwaba awu bàcyànkunya bàzòkà, nè bùumuka pa cibùmbà cya ku cyambilu, kabàyi bàbùcyùka to. Kabèèna bàcyùka to.

⁶⁵ Bwànyì mèmè, bìdì bimwèka bu nè, muntu mwikalè nè nyumà wa mùshindù kampàndà kùdiye, anyi Nyumà wa Nzambì munda mwèndè, nènku yêyè mumòne Mukalenge Yesù wènza ànu cyàkambàYe nè Neénzè aci, cìvwa cìfwànyine kusalula mwoyi wèndè mu mùshindù wà nè, kàvwakù mwà kushààla mupùwe ntàntà mule kàbìdì to. Ùvwa mwà kulakusha ditùnga kapyà nè Mukenji. “Ànu mwàkadibi mu matùkù awu,” mwàkambàYe, “ki mwikalàbi kàbìdì.”

⁶⁶ Mukenji awu wàkapàtuka, kàdi bòbò baakawùseka ànu cyanàànà nè baakawùseka, bu muntu kampàndà uvwa munkaci

mwà kwamba bwalu bwà mashimi. Kàdi ùvwa wà luse, nè ùvwa wà ngàsà, nè ùvwa wà disùngidiibwa. Kaa, ekèlekèle!

⁶⁷ Ke Mwanjèlò kwambayè, mu dindà adi, kùdi Lotà, paanyimà pàà Yèyè mumanè kufila mukenji; Yèyè kwamba nè: “Kolèsha, bànda kùnweku, bwalu ncyèna mwà kwenza cintu nànsha cìmwè to too nè pawàfikà apa.” Ndi muswè bwà nùmonè cyòcì eci mpindyewu, bwalu bìdi bikèngela bwà twètù kwimakijila kaaba aka, bwà mulongo wà babèèdi. Nuvwakù bamòne cìvwà Mwanjèlò awu mwambè anyi? “Ncyèna mwà kwenza cintu nànsha cìmwè to too nè pawàlwà mwab’ewu.” Cìvwa ncinyi? Cìvwa mmukenji wà disùngila. Nè kumpàlà kwà kantòlantòlà kàà kapyà kàmwèpelè kumatakù kuumukila mu Dyulu, bìvwa bikèngela bwà Lotà kwikalayè mupàtùke mu Sodomà.

⁶⁸ Kàdi kumpàlà kwà dimata dimwè dyà mvùla kumatadi difùmina mu Dyulu, Noà wàkabwela mu bwàtù.

⁶⁹ Ne kumpàlà kwà bômbè bwà mushindà kutuutabù ditunga edi, Èkèleeziyà neàye mu Dyambwibwa, bwà katwilangana nè Mukalenge Yesù. Nè piikalà tuumàlòngò tùdi túbùùka nè mìsilè mbiteèkùibwe, nè nsandu mmyaluja paanyimà, Banjèlò mbiimàne mu bulongàma. Àlèluuyàh! Tujila tunène twà mu Dyulu ntupàte tètè nè mìsùmbà. Nzènzè yidi yònsò myakaja. Mìsùmbà minène yà bimbi yikaadi mimanè kudiibidija. Nyèwù kùdi cikondo cyà Dyalukila Kumbèlu àbìdi àdi panshì aa, bwà Èkèleeziyà wa Nzambi udi nè mwoyi, uvwa mwindile Dilwa Dyèndè awu. Byònsò mbimana kulongolola. Ndi nè disànkà dyàbùngi be. Ndi ngènda ncyòka bikolè be. Kaa, bwà dībà dinène adi!

⁷⁰ Nè pakwela meeji nè, tuvwa nè citùpà mu ndungilu wa cikondo ewu! Vùlukàayi nè: “Ke mwikalàbi kàbìdi ku dilwa dyà Mwànà wa muntu, piikalà Mwànà wa muntu munkaci mwà kubuuludiibwa mu Dyulu.”

Mpindyewu, vùlukàayi nè, kumpàlà kwà mvùla kumatayè, Noà ùvwa mu bwàtù.

⁷¹ Kumpàlà kwà kapyà kumatakù, Lotà ùvwa mupàtùke mu Sodomà. Bwalu, Mwanjèlò wàkamba nè: “Ncyèna mwà kwenza cintu nànsha cìmwè paùdi kùyì mwànji kulwa apa to. Ndi nè kakombo mu cyanza cyànyi, bwà kukòka nè kwenza nè tupyà tùlokè tùfùmina mu Dyulu.”

⁷² Nè ndi ngèèla meeji nè mmwômò menemene. Mwanjèlò wa kabùtù mmulamìne cyanza cyà Russie, nè bombè bwà mushindà; too nè pàdi Èkèleeziyà ùdisanga, nè Mubidi munènè wùmwèpelè wà Kilistò. “Ncyèna mwà kwenza cintu nànsha cìmwè to ànu too nè pawàlwà apa.” Kaa, aci cyòcì kaciyi ditwishiibwa dibènesha to!

⁷³ Nènku twètù bamòne bintu byònsò bitèèka mu bulongàme, dyalukila dyà Èkèleeziyà Kumbèlu didi mu bulongàme. Ke Mwanjèlò wa Nzambi ewu mwikalè nè Mukenji wùmwèwùmwè

awu, wènzà bimanyinu bimwèbimwè abi, maalu à kukèma àmwèàmwè awu, byònsò bitèèka mu bulongàme. Branham Tabernacle, kùkaadi bidimu makùmi àbìdì nè bítaanu, bu nànkù's, mwà mwakùle pa cyambilu cìmwècìmwè eci nè munwàmbile nè bintu ebi nebyènzèkè, dìmwè dyà ku matùkù àdì panshì aa. S'ki cyòci eci! Tukàadi ku cikondo cyà nshìikidilu. Ndungilu ùdì kaaba aka. Dìbà dikaadi pabwìpì nè diya dyà Kumbèlu bwà Èkèleeziyà.

⁷⁴ Badyudi, bèèlulwila, bàseka, bàseka bàkenya, mwàkadibo nè Mfùmù Nebùkàndànèèsà nè Beleshààsà amu. Ke mwàkadibe kàbìdì mu matùkù à Noà. Ke mwàkadibi mu matùkù à Lotà. Nè bàdì munkaci mwà kwenza cintu cìmwècìmwè aci leelù ewu.

“Ncyèna mwà kwenza cintu nànsa cìmwè pawikalà kùyì mufike apa to.”

⁷⁵ Ndi muswè bwà nùmonè nè, Lotà wàkapàtuka mu cintu kampàndà cìvwà mwà kumubùtula, nè Noà wàkabwela mu cintu kampàndà cìvwà mwà kumusùngila. Nènkù aci's ncifwànyikijilu cyà Èkèleeziyà. Tudi bapàtùkile mu buloba, nè buumùke ku cikondo cyà Elvis Presley eci nè cyà Arthur Godfrey citùdimu nè mwoyi eci. Pàtukàayi mu buloba nè bwelaayi mu Kilistò! Pàtukàayi mu buloba. “Mbàa pa buloba, nebàbutukè pàmwè nè buloba.” Aba bàdì mu Kilistò nebàye Kumbèlu nè Kilistò. “Bwalu aba bàdì balàale tulù mu Kilistò Nzambi neàlwe naabò pàmwè Nendè pààlwàYe.” Tudi bapàtùke mu maalu à pa buloba, bwà kubwela mu Kilistò bwà dikùbiibwa. Kaa!

⁷⁶ “Kàdì ncyèna mwà kwenza cintu nànsa cìmwè paùdì kùyì mwanji kufika mwaba ewu nànsa.” Mèmè ntu munangè aci. “Ambùlùja! Pààndukà!” Mukenji ùvwà wà lùkàsàlùkàsà. “Ambùlùjà! Ambùlùjà! Pààndukà!”

⁷⁷ Dìna dyà Mukalenge dibeneshiibwè! Yesù wàkalaya nè Èvànjeeliyò ewu neàyiishiibwè. Ùkaadi munkaci mwà kuyiishiibwa mpindyewu munda mwà bidimu nè bidimu. Kàdì's ke cyòci eci ku cikondo cyà nshìikidilu, cìmanyinu cinènè cyà ndekeelu. Ànu kumpàlà kwà Banjèlò kwelabò lubilà nè: “Lwìjàkàjà,” Yèyè kukudimuka è kwamba nè: “Sarah wàsekì bwà cinyì?” Mwanjèlò wa kabùtù, kwambaYe nè: “Ndi mùmwè bwà mpèekaatu yàbò, nènku Ndi mpuweke bwà kumòna nè mbulelèlè anyì kì mbulelèlè.” Kàdì kusanganaYè nè cìvwà bulelèlè. Nè mukenji wùvwà ngàsà, nè luse, nè disùngidiibwa. Kàdì: “Lwìjàkàjà! Lwìjàkàjà!”

⁷⁸ Kaa, nwènù bânà, kanùsòmbi bakonàme nè nwenda nudyèla nkonko to. Lwìjàkàjaayi! Lwìjàkàjaayi! Lùkàsà! Cikondo cikaadi pabwìpì. Kunyeemena (penyi?) kupàtuka pambèlu mwàkenzà tunyuunyi tukesè atu, kuumuka ku bimanu binène byà cyena-leelù byà Baabùlòònà ebi, màngumba manène à kale àdì àmba nè: “Kakwèna dishiilangana mu cikondo to.” Èkèleeziyà minène yà kale yà beena bupidyà eyi yidì yàmba

nè: “Cintu pààci nè ndyondopa dyà kùdì Nzambì kacitukù to. Kakwènakù bishimà to.” Umùkaayi ku bimanu abi, bwalu byôbì nebyùpukè. Nebidishindè mu dibùtuka nè dicimuniyibwa, bwalu Nzambì wanyì ngudi mwambè nànkù awu.

⁷⁹ Nyeemààyi nùpàtuke nùkabwelè munkaci mwà Kàlvariyò dyàmwàmwà's! Pùikalà nyuunyi miyè ku micì, wèwè udi uya ku mucì, wèwè pèèbè, mucì awu wùvwà Kilistò mupoopèdiibwekù awu. Mwômò amu mulembelele pankaci pà ngàsà Wendè, nè wèla lubilà kùdì Nzambì too nè pààpità cipeepèlè cicolè aci.

⁸⁰ Lwijàkàjà! Pàandukà! “Lwàkù apa, bwalu ncyènà mwà kwenza cintu nànsha cimwè too nè pawàpàtukà.” Yèyè mmukwindile. Umùkaayi ku bintu byà kale byà cyena leelù ebi. Umùkaayi ku ntèlèviziyò awu pàdì manayi à mùshindù awu àbanga. Umùkaayi. . . Kàngaayi cisanji aci pàdì bìdùndadùndà ebi bibanga. Enzà maalù bu inàbànzà. Vwàla bilàmbà bu inàbànzà. Enzà maalù bu muntu mulùme. Vwàla bilàmbà bu muntu mulùme. Akulà bu mwena Kilistò. Ikàlà nè nsòmbelu bu mwena Kilistò. Oshà bilamba byònsò. Lwijàkàjà! Pàtukà! Dibutudiibwa didi pabwìpì. Nzambì muumvwè ku mwoyi kumwenda nè mmucyòke.

⁸¹ Kaa, dībà dikaadi diyè kupita mùdì wèwè wela meeji amu. Dībà dikaadi pabwìpì. Luse lwà Mwanjèlò, Mwanjèlò wa luse Wàkatùma Mukenji Wèndè awu, ùdì kaaba aka mene dilòlòlò edi. Nudi nuciitabuujà anyi? Bidi bìkèngela bwà Èkèleeziyà àye kumpàlà kwà cipungu cyà Dikènga dinène anyi?

⁸² Tàngilààyi, Izalèlèlà wàkabwela mu Goshènè, nè Èjiipitù kubwelayè mu mîdimà. Èjiipitù wàkabwela mu Goshènè, wàkangaciibwa mu buloba bulaya. Èjiipitù wàkabwela mu mîdimà, nè wàkajiikiibwa mu Mbù Mufwè.

⁸³ Lwijàkàjà! Lwijàkàjà! Pàandukà! Eci ncifwànyine kwikala mpùngà webè wa ndekeelu. Kàdì vùlukààyi nè, tudi tumòna mìsilè mishikika. Tudi tuyùmva, tudi tuyitàngila mu cibèjibeji. Buloba bujimà bùdì munkaci mwà kuzakala. Cintu cyònsò civwà Nzambì mwambè cidì munkaci mwà kwenzeka.

⁸⁴ Kàdì bishi bwà bwalu abu? “Mu ditùkù dyàDibuululà Mwànà wa muntu mu Dyulu.” Mwànà wa muntu ncinyi, wàkabuuludiibwa awu? Yesù Kilistò umweumwe awu makèèlèlè, leelù, too nè kashidi. Tàngilààyi mvensà wa 21, anyi mvensà wa 30, nyèyè awu.

Ke mwikalàbi kàbìdì mu matùkù awu pùikalà Mwànà wa muntu munkaci mwà kubuuludiibwa mu dyulu.

⁸⁵ Ncinyi aci? Mikenji eyi yidì. . .Cintu eci kacya kacitukù cyànji kwenzeka to kwambwila pàvwà Yesù pa buloba. Kàdì's ke cyòci eci, ku ndekeelu kwà cikondo cyà bàà Bisàmbà byà bendè. Twànjààyi bì kucitàngila bwà katanci kakesè cyanààna, nè kwelangana meeji bikolè.

⁸⁶ Pāvwa Yesù pa buloba apa, Yèyè kàakambakù mùvwàYe mwondopi to. Yèyè wàkamba nè: “Kì m’Mèmè udi wenza byenzedi to; n’Taatu Wanyì. Kàdi Mèmè ndi ngèza ànu cidi Taatu ùNdeeja bwà kwenza aci.” Yone Munsantu 5.19, Yèyè mmwambè nè: “Bulelèlà, bulelèlà, Ndi nnwàmbila nè: Mwànà kèna mwà kwenza cintu nànsha cimwè mu Yèyè mwinè to, ànu cidiYe ùmòna Taatu wènza aci.”

⁸⁷ Bu nwènu mwà kumòna Filipò, pàakakùdimunàye mucima dyàmbedi. To . . . PàakabangaYe kumpàlampala mudimu Wèndè wà bwambi, Mukalenge Yesù, cyàkenzekà ncinyi?

⁸⁸ Twànjàayi kumòna mwikalà Mwànà wa muntu mwà kuDibuulula. PiikalàYe umweumwe awu makèèlèlà, leelù, too nè kashidi, nebikengelè bwà Yèyè kuDibuulula bu mwàkenzàYe makèèlèlà amu. Yèyè ùDibuulula mùshindù wùmwèwùmwè awu, nebikengele bwà Yèyè kubuulula Mukenji wùmwèwùmwè awu. Mu cimùmà, kàdi tàngilàayi.

⁸⁹ Pàakalwà Peetèlò kùdiYe paanyimà pàà mudimu Wèndè wà bwambi, Yone Munsantu 1. Peetèlò kuseemenayè kùdiYe. Kàvwa ùbìkidiibwa nè m’Peetèlò díbà adi to; ùvwa ùbìkidiibwa dína dikwàbò. Kàdi pàakaseemenayè kùdiYe, kwambaYè nè: “Wèwè udi Simonà, nè tatwèbè n’Yona.”

Mulòbi wa kale awu kudyàmbidilayè nè: “Wàmmanyi munyi?”

⁹⁰ Nè pashiishe Filipò, wa ku Bethesda, yèyè pèndè, kunyùngulukaye mukùnà, nè kusangana mulundà wendè kampàndà, Natànàèlà, mwínshì mwà mucì kampàndà, ùsambila. Yèyè nè: “Lwàkù, ùmone utùdi bapetè: Yesù wa mu Nazàlèètà, mwànà wa Yözefù.”

Tàngilàayi mpindyewu mùdiYe muDibuulùle.

⁹¹ Ke yèyè nè: “Mpindyewu nkufwànyineku kupàtuka cintu cimpè mu Nazàlèètà anyi?”

⁹² Yèyè nè: “Lwà ùmonè.”Adi’s ke dyandamuna ditàmba bwìmpè didi muntu kanà yònsò ewu mwà kupèèsha mukwàbò. Kùcisendèki to. Lwàku, ùdìmwènè wèwè mwine. Kaa, twìkalapù nànsha mwà kwikala nè meeji matòoke à mùshindù awu’s wè, leelù ewu.

⁹³ Nè mu bule bwà njila wendè ewu, kubangayè kumulondela. Mòna’s, yèyè nè: “Peetèlò, makèèlèlà awu, muntu kampàndà . . . Kefà, s’udi mumanyè mulòbi wa kale awu’s?”

“Èyowà’s.”

⁹⁴ “Wàkaseemena kumpàlà kwà Muntu ewu, nè Wàkamwambila nè yèyè ùvwa nganyi nè tatwèndè ùvwa nganyi.”

“Aa,” mwàkambà Natànàèlà, “mèmè ncyèna mumanyè abi to.”

95 Nènku pàakaseemenàye mwaba wùvwà Yesù ùsanganyibwa awu, mu mulongo mùvwàYe ùsambidila babèedi amu, Yesù wàkamoosha mèsù, ke kwambaYè nè: “Mònaayi, mwena Izàlèèlà mwena munda mùdi kamùyì budimù nànsha.”

96 Mmunyi mwàkamanyàYe nè ùvwà mwena Izàlèèlà? Beena Ngelikà nè bônso, bàvwa bàlwàtà mùshindù wà mwomùmwe nè bafwànàngàne. Mmunyi mwàkamanyàYe nè yèyè nè ùvwà mwena Izàlèèlà? Ùvwà Nzambi mumwèneshiibwe mu mubidi. CyàkenzàYe ncinyi? Kutàngilayè nè Kumumònayè.

Yèyè nè: “Udi mummanyè díbà kaayi, Laabi?”

97 Yèyè nè: “Kumpàlà kwà Filipò kukubiikilayè, paùvwà mwînshì mwà mucì apu, Mémè mvwa mukumòne.”

98 Yèyè nè: “Aci’s ncikose bwalu. Wèwè udi Mwànà wa Nzambi. Udi Mfùmù wa Izàlèèlà.”

99 Yesù wàkamba nè: “Bwalu Ndi mukwambile cyôci eci, washiiishi kwitabuuja’s?” Yèyè nè: “Pashiishe udi mwà kumòna bintu bitàmbe nè eci bunène.”

100 Kàdi cidimba cyà èkèleeziyà cìvwà kacìyi cìitabuuja cìvwà ciimàne mwaba awu. Kaa, ànu nè kaneemu kààbúngì nè lulamatu mwàci mwónso. Ncyà bushùwà menemene. Bàvwa biimàne mwaba awu nè malonga manène à tùlaasà, malabula manène à tèòlòjì à ku sèminère. Kwambabò nè: “Muntu ewu mmwena lubùkù. M’Beelèzèbùlà.”

101 Yesù wàkamba nè: “Nwènù bangàmbè Mémè aci, Nènnùfwilè luse. Kàdi pààlwà Nyumà Mwímpè kwenza cintu cìmwècìmwè aci, díyi dibì dìmwèpelè bwà Yèyè awu kadyàkufwidiibwakù luse to, ní mmu buloba ebù ní mu cikondo cìcìlwalwà.”

102 Kùvwà mukàjì mukesè kampàndà uvwa nè disaamà dyà mashi àlwa munda. Ke kupicilayè mu musumbà wà bantu awu nè kulengayè cìvwàlù Cyèndè, bwalu wàkadyàmbidila munda mwèndè nè: “Bu mémè mwà kulenga Muntu awu, nèngòndopiibwè.” KuMulengayè. Kuyayè lubilu mu musumbà wà bantu awu, nè kusòmbayè, anyi cyónso cyàkenzàye aci.

Ke Yesù kukùdimuka, kwamba nè: “WàNdengi awu nganyi?”

103 Peetèlò kuMutàndishayè. Kwambayè nè: “Tàngilà, musumbà mujimà ewu’s wùdi munkaci mwà kuKulenga. Bwà cinyi Udi wamba nè ‘WàNdengi awu nganyi?’”

104 Yèyè nè: “Kàdi Ndi muumvwe butekète. Bukolè, anyi dikàndà’s, mbupàtùke mu Mémè.” Ke kukènzakanaYè, nè mèsù awu, too nè mwàkamupetàYe. Mmunyi mwàkacyénzàYe? Aci katwèna bamanyè to. Kàdi Yèyè’s ùdi umweumwe awu makèèlèlè, leelù, too nè kashidi. Nè WàkaDìbuulula kùdi cisàmbà cyà beena Yudà mu mùshindù awu.

105 PàakalwàYe kùdi beena Sàmaalèyà, mukàji awu ùvwa ku ciinà cyà mâyi, mukàji mulenga mwena Sàmaalèyà awu's.

106 Vùlukàayi nè, kùdi bisàmbà ànu bisàtù byà bantu. Mbwenà kwamba nè, beena Yudà, bàà Bisàmbà byà bendè, nè beena Sàmaalèyà; beena Ham, beena Sem, nè beena Yafètè. Nè beena Sàmaalèyà bàvwa citùpà beena Yudà nè citùpà bàà Bisàmbà byà bendè. Kàdi nudi bavùlùke pàakabangàci, pàakasèlàbo bakàji bààbò, nè bikwàbò.

107 Ke nsongàakàji ewu kubàndayè kuntwaku, citùdi twitabuuja mu ditùngà dyètù nè mmukàji wa luumù lubi, kàdi kí ncìwàye to. Mwànà wa balùme wa mu Inde ewu ùvwa mwà kunwàmbila cyòci aci. Ewu's m'Mukàndà wà ku esètè, nè nudi nuteeta kuwùbala nè dilonga dyà tùlaasà dyà ku wesètè.

108 Pangàakayà ku Inde, nè kupàtuka ku—ku ndèkè, ku Bombay, kùvwa mwèpiskòpò wa èkèleeziyà wa ba-Méthodistes, nè bônso abu, biimàne mwaba awu. Yèyè nè: “Kùtwàmbidì nè udi mpàndànjlà to, Mukalenge Branham. Twètù tudi bamanyè byàbùngì pa bwala bwà Bible kutàmba munùdi nwènù ba-Yankee mwà kumanya.” Kàdi aci's ncilelèlè. Yèyè nè: “Tuvwa nè Bible kùkaadi bidimu binunu bibidì kumpàlà kwà nwènù kwikala ditùnga.” Ncyà bushùwà. Èkèleeziyà wa Munsantu Thomas ùcidi ànukù, mwàkapwekà Munsantu Thomas è kuyiishamù. “Kàdi,” mwàkambàye, “tudi tuumvwa nè Nzambì mmukumwènèkèlè, bwà kuvwija Bible ewu cyàkàbidì nè mwoyi.” Yèyè nè: “Ke citùdi baswè kumanya aci.” Ke cyòci aci. Bàà pa buloba bàdi nè nzala yà dyàmpà didì nè mwoyi.

109 Mukàji wa beena Sàmaalèyà ewu, bu mwàkadiye mwimane ku ciinà cyà mâyi, Yesù kumwambila nè: “Mukàji, Ntwàdilèku mâyi à kunwà.”

110 Èè, kwambayè nè bàvwa nè disungulujangana. Kàdi Yèyè kumumanyisha nè kakùvwa dishiilangana nànsha dikesè to. Nzambì wàkenza, ku mashi àmwèpelè, bisàmbà byònsò.

111 Ke Yèyè kwamba nè: “Bu wíkala mumanyè Mwinè ùdi wakula nendè ewu, wèwè's nguvwa mwà kundòmba Mémè mâyi à kunwà.”

112 Ke muiyiki kutùngunukawu too nè pàakabàkulàYe nyumà wendè. Pashiishe kujandulayè cìvwa lutàtù lwèndè. Yèyè nè: “Ndà ùkangàtè bàyeebè kàdi ùlwe mwab'ewu.”

113 Cyàkenzekà ncinyi pàakambilàbo mwena Yudà cyòci aci? Mwena Yudà wàkamba nè: “Wèwè udi Mwànà wa Nzambì.” Ncyà bushùwà.

114 Cyàkenzekela mwena Sàmaalèyà ncinyi pàakamwambilàbo cyòci aci, wamba nè: “Ndà ùkangàtè bàyeebè kàdi ùlwe mwab'ewu”?

115 Yèyè nè: “Mukalenge, ndi njingulula nè Wèwè ewu udi Mupròfètà. Mpindyewu, tudi bamanyè nè pàalwà Maasiyà, udi

ubiikidiibwa nè n'Kilistò awu, pààlwàYe, Yèyè neàtwàmbilè maalu aa. Kàdi Wèwè udi nganyi?"

Yèyè nè: "Mémè ke Yèyè udi wakulangana neebè ewu."

116 Kubwelayè lubilu mu cimenga, è kwambayè nè: "Lwâyì, kanùmonàayi Muntu udi mungambile bintu bìndi mwenzè. Kì m'Maasiyà awu anyi?"

117 Nè Yèyè kààkenzakù aci to, musangu nànsha ùmwè, bwà muntu wa bàà Bisàmbà byà bendè. Bwà cinyi? Wàkacishiya too nè ku ditùkù edi. Ke cyàkambàYe apa nè: "Mu matùkù ìkalà Mwànà wa muntu mwà kuDìbuulwila mu Dyulu awu." Ùdi munkaci mwà kuDìbuulula mpindyewu, kùdi Èkēleeziyà, bwà luse. Musangu wàlondà wùdiYe ùDìbuulula, mmu dibùtuka, kùdi aba bàdi babènge Mukenji abu.

118 Nzambi ìkalèku nè luse bwà...kutùdì, patùdì tusambila bwà katanci kakesè cyanààna apa. *Bitùulùbitùulù Nè Kalolo Kònsò*, Mwanèètù wa bakàji Gertie, bu wèwè mwà kuswà.

119 Ndi ànu ndikonka, dilòòlò edi, mùndi ndyùmvwa bibi bwà nwènù kwikala biimàne ku luseke lwà cimanu. Nè ndi mwà kuumvwa dizùkà dyà myoyi yènù's. Ndi ànu ndikonka, kaa, bu nwènù mwà kwikala nè meeji matòòke kunùdi nwènù biine nè kùdi Nzambi, bwà katanci kakesè cyanààna.

120 Ncyà bushùwà nè nudi baswè kulwijakaja bwà kupàtuka mu cyòci eci anyi? Kùdi Muntu kampàndà mu bwikadi dilòòlò edi, udi ubiikidiibwa nè m'Mukalenge Yesù. Yèyè ngudi nè tikè bwèbè wèwè, nè cyònsò cidi cikèngela bwà wèwè kwenza cidi ànu kuMupèesha mwoyi wèbè cyanààna. Yèyè neàwùsukulè mu Mashi Èndè Sungasunga, nè neànùkezùlè ku mpèkaatù yònsò nè mpatà, nè neànùfikishè mu Dyulu Dyèndè pààlwàYe.

121 Nènku mbifwànyine kulwa kumpàlà kwà dindà, tuzùbù tùdì túbùùka atu. Kakwèna cintu nànsha cimwè to mùdi maalu à mamanya àmba...Nudi nucyùmvwa, ditùkù dyònsò edi, ku tudyòmbà, pàdìbo ku ntèlèviziyò, pàdìbo bèèla maalu à mamanya aa nkonko apu. Bàdi bàmba nè: "Kakwèna cintu cyàpangisha buloba ebu bwà kutayishiibwabò mu kasunsa kanà kònsò to." Bìdi ànu bìkèngela kunwà kwà ngalaasa wa maalà à Vodka, nè nebàkokè ànu kakombo, nè bwalu pààbò bumba bùjika.

122 Tùlwijakaja! Mukenji ngwà lùkàsàlùkàsà. Lwijakaja! Pàndukà! Nyeemàayi lubilu bwà kusùngila mwoyi wènù! Pàtukàayimù. Pàtukàayi mu Baabùlòonà wa cyena-leelù ewu. Pàtukàayi mu bimanu abi. Kwènàku mwà kuumvwa cintu kampànda cikòka munda mwà mwoyi wèbè amu anyi? Pawikalà wa nyumà bulelèlè, nè Nzambi mwikale wakula neebè's! Cyà bushùwà, pùikalàYe wàkaakula nè tunyuunyi tukesè atu, Yèyè's ùdi mwà kwakula neebè.

¹²³ Udikù mwà kwela cyanza cyèbè muulu kùdiYe anyi? Katwèna nè mwaba wà kutèeka bantu ku cyoshelu eku to. Kàdi bu wèwè ànu mwà kwela cyanza cyèbè muulu, nè kwamba nè: “Nzambi, ikàlàku naanyi luse.” Nzambi àkubènèshè, mwanèètù wa balùme. Nzambi àkubènèshè. Kaa, ekèlekèle! Mu nzùbu mujimà emu. Ncyèna mumanyè nè kùdi byanza búngi kaayi to. “Ikàlàku naanyi luse, Éyi Nzambi. Cyànyi cyanza ncyôci eci. Ndi muswè kupànduka, Mukalenge. Kumpàlà kwà dindà, ndi mufwànyine kuumvwa lubilà lukolè, ntàngila pambèlu nènku ke myanzankòngòlò eyi munkaci mwà kutàmbakana mu maulu, Mwànà wa muntu mufwànyine kwikala wènda ùlwa.”

¹²⁴ Nditùkù kaayi dyà dikwàcisha bwôwà, dyùdi mupangile mpungà webè. Wèwè uvwa mwimàne ànu mu nyùngulwilu wa ekèleeziyà webè, kî mmwômò anyi? “Kaa,” mùdi wamba, “maman ùvwa wa mu cikampàndà.” Abi’s mbîmpè, mwanèètù wa balùme. Abi’s mbîmpè, mwanèètù wa bakàji. Kàdi lupàndu lwà maman kalwàkukubwejamù to. Maman wàkadi nè mwoyi mu ditùkù kampàndà, kàdi wèwè udi nè mwoyi mu dikwàbò.

¹²⁵ Umvwa Mukenji wà Mukalenge, nè umvwa didimwija dyà Nyumà. Ùvwa n’Nyumà wa mùshindù kaayi, Ewu wàkajingulula mùvwa Sarah ùseka munda mwà ntentà awu? Mwanjèlò wa Mukalenge.

¹²⁶ Mpindyewu nè mitù yènù miinyika, ndi muswè kusambidila muntu nè muntu wa kunùdi.

¹²⁷ Cyùdi mwenzè ncinyi pawèdi byanza muulu apu? Udi wamba nè: “Aci cìvwa cyùmvwija cintu kampàndà anyi, Mwanèètù Branham?” Éyowa bushùwà. Wèwè mwikàle wambilamù, cìvwa cyùmvwija dishiilàngana pankaci pàà lufù nè Mwoyi. Mukenji ngwà lùkàsàlùkàsà. Kwènàku mwà kwela cyanza cyèbè muulu mpindyewu mene anyi? “Ikàlàku naanyi luse, Nzambi, kùndi.”

¹²⁸ Nzambi àbèneshè mwànà mukesè wa bakàji awu. Nzambi àbèneshè inàbànzà awu. Nzambi àkubènèshè; wèwè, mwanàànyi wa balùme; wèwè, wèwè, nsongààlùmè. Bânà bakesè bàdi banyùngùlùke ku cyoshelu biikàle nè byanza byàbò bikesè byela muulu. Èè, bèneshààku myoyi yàbò mikesè!

Wèwè udi wamba nè: “Kî ncìdibo baswè kwamba to.” Kaa, èyowà’s, s’ki cìdibo bàmba.

¹²⁹ Yesù wàkamba nè: “Lekèlaayi bânà bakesè bàlwe kùNdi, kanùbàkandiki to, bwalu bukalenge bwà Nzambi mbwà bàdi bu bôbò aba.” Bìdi mwà kwenzeka nè kabàshàadi nè mwoyi too nè ku dikola to. Kàdi, cyènzàbo. Kabààdyàku . . . Nebàpàndukè, pàmwàpa, bintu binène byònsò bìvwà bikèngelà bwà twètù kupicilamù abi.

¹³⁰ “Nzambi, ikàlàku nè luse!” Panùdi nwela byanza muulu apu, bìdi bìleeja nè kùdi cintu kampàndà munda mwènù amu cìdi cyangàte dipàngadika. Mubidi wèbè wùvwa mufwànyine kwikala mufwè bu kakùyì cintu kampàndà munda mwèbè amu,

cìvwà cyàmba nè: “Elà byanza muulu.” Aci’s cìwva n’Nyumà. Dìbà adi elà cýanza cyèbè muulu. Nzambi ngudi mucijaadike. Nyumà mmukufikishe ku dyela cýanza cyèbè muulu.

¹³¹ Nzambi ànùbènèshè, nè bânà bakesè bônso bàdi paanyimà pààpa. Bânà bakesè, bàà bafiike abu, bôbò pààbò, lwà kuntu kwàka, Nzambi àbèneshè myoyi yènù mikesè ayi, munanga wanyì. Nzambi mmunùangè. Bushùwà’s.

¹³² Netùpatukè mwab’ewu, òmwè dyà ku matùkù àdi panshi aa. Ncyèna mumanyè nè necyènzèkè dìbà kaayi to, kàdi ci—cìlwalwa. Tùlwijakajàayi, nè lùkàsà lwónsò, bwà kubwela mu Bukalenge’s! Wèwè udi wamba nè: “Èè, s’nkaadi muumvumvwe aci kwónsò eku.” S’udi mufwànyine kucyùmva wèbè musangu wà ndeekelu, kàbidi’s. Lekèlè eci ciikalè cikondo.

Nzambi àkubènèshè paanyimà apu, wèwè nsongàakàji.

¹³³ Ndaayi kule nè cìntàkanyì cyónsò cyà kale cyà cyena-leelù eci, bimanu byà kale ebi. Byónsò abi nebitonkokè. Maja ónsò à bìdùndadùndà nè bintàkanyì byónsò ebi nebibutukè pàmwe nè buloba. Kùbwedikù mu maalu à pa buloba to. Pàtukàmu. Nzambi ùdi ùlwa bwà Èkèleeziyà Wendè. Yèyè mmukusungùle, ke bwà cinyì Ùdi wàkula neebè. Mukenji ngwà lùkàsàlùkàsà. Lwàkù lùkàsàlùkàsà!

¹³⁴ Mpindyewu, patùdi tusambila apa, ikàlà nè meeji matòoke mpindyewu nè ùlomba Nzambi bwà ikalèku neebè luse.

¹³⁵ Mukalenge mubènèshìibwè, nkufwànyìnekù kwikala bantu kaaba aka bàtù kacya kabàiyikù bânji kumòna bwenzeji bwà makolè à Nzambi kwónsò eku, kàdi cintu kampàndà munda mwà mwoyi wàbò ncyambè nè: “Elà cýanza cyèbè muulu. M’Mémè.” Nèku bàdi bàmòna nè kùdi dibìikila dyà lùkàsàlùkàsà. Bôbò, bàdi nè meeji búngì bukùmbàne bwà kukènzakana nè kumòna nè kùdi cintu kampàndà pabwìpì nè kwenzeka.

¹³⁶ Bânà bakesè, bààbùngì bàà kùdìbo bàvwa beelè byanza byàbò muulu. Nzambi, ikàlaku naabò luse. Bàbùngì bàà ku banunu nè bakùlumpè, mbèlè byanza byàbò muulu. Bansongà mbeelè byanza byàbò muulu. Bàdi bàjinga luse, Nzambi. Nè ndi nè disànkà dyàbùngì dyà kumanya nè dibuulula dyà kumpàlà dyà Kilistò didi luse; dibuulula diibìdi neilumbulwidi. Èyì Nzambi, twasàkidila bwà aba bàdi bangàte luse dilòòlò edi, njila wa luse. “Bàà disànkà mbeena luse, bwalu nebàpetè luse. Bàà disànkà ng’aba bàdi nè nzala nè nyòòtà yà bwakàne; nebùujiibwè.”

¹³⁷ Kenkèsha makènkè àbò, dilòòlò edi, Mukalenge. Swàkù bwà bìikalè tùndeyì tùdi tutèeka pa kakùnà, tùdi katùyì mwà kusokokiibwa to, kàdi bàfilakù bukènkè kùdi bilongelu nè myaba yìkalàbo mwà kuswikakana naayi, kubangila ku mpindyewu. Enzàku nànkù, Mukalenge. Swàkù bwà bìikalè makènkè ikalà mwà kukenkesha bwà butùmbì bwà Nzambi. Bàbènèshekù.

¹³⁸ Nènku mu ditùkù kampàndà, mu buloba butàmbe bwímpè, Mukalenge, swákukù bwà tütwilanganè bônso banyùngùlùkile mèèsà manène à Nzambì awu, ku Didyà dyà Dibanjì adi. Lamàku Nyumà Webè pambidi pèètù, Mukalenge. Bèneshàku aba bàdi biimàne ku myelelu yà bimanu, nè mu lutanda nè mu nyùngulukilu amu, bàdi beelè byanza byàbò muulu, nè bikwàbò. Ikàlàku naabò, Mukalenge. Mbiimàne kuulu, nè tukùlàkàjì tubàkwàte ku mikòlò, dilòòlò edi. Kàdi, ikàlàku nè luse. Enzàku bintu ebi.

¹³⁹ Bàdi mamuma à Mukenji ewu mukesè wà dilwijakaja dilòòlò edi. Ndi ndòmba bwà banjèlò bàà Nzambì bàcìvwijèku cilelèlè menemene mu myoyi yàbò, bwà kabàpangidikù—kabàpangidikù nànsha cintu nànsha cìmwè cyà ku Cyòcì aci to. Nènku bóbò mmamuma, nè mèmè ndi mbàfila Kùdì. Nè Wèwè udi ubàfila kùdì Yesù, bwalu mmapà Èbè à dinanga kùdìYe. “Muntu nànsha umwe kèna mwà kubànyènga mu cyanza to, bwalu muntu nànsha umwe kì mmunène kutàmba Nzambì to.” Nènku ndi ndòmba bwà Ûbàlamè mu dikùbiibwa dyònsò too nè pààlwà Yesù bwà bwalu bwàbò.

¹⁴⁰ Swákù bwà bakwàbò abu bàlwijakajè, Mukalenge, nè bàlwijakajè, bwalu Mukenji ngwà lùkàsàlùkàsà. Tudi nè cyà kupàtuka lùkàsàlùkàsà kumpàlà kwà kabùtù kulwakù. Nènku mpindyewu, Mukalenge Nzambì, ndi ndòmba bwà Wèwè kutùmakù Mwanjèlò Webè, Yèyè umweumwe uvwa musòmbè nè Abraham awu. Enzàku nànkù, Mukalenge. Nè ùvwa mwà kwamba cìvwà Sarah wènza, paanyimà mu ntentà. Nè awu ùvwa Mwanjèlò wa Cipungidi. Awu ùvwa m’Mwanjèlò wàkatwàla luse kumpàlà kwà kapyà kumatakù. Pa dîbà kanà dyònsò edi, kapyà kàdi mwà kulòka mpindyewu, tupwishipwishi tùvwà mwà kupandulula buloba bujimà bipese bibìdì. Swákù bwà Yèyè àlwe dilòòlò edi àtùpè luse, Mukalenge, bwalu tudi tulòmba nùnkù mu Dîna dyà Yesù. Amen.

¹⁴¹ Kaa, kùdì cintu kampàndà pa bìdì bitàngilà Èvànjeeliyò mubènesha wa kale ewu, Ùdi ùmwèka bu ne ùdi ùkukezula. Ndi muMunangè.

¹⁴² Twìmbààyi aci musangu wùmwè nè: “Bitùùlùbitùùlù nè kalolo kwònsò Yesù ùdi ùbìikila.” Bantu bònso, twèlààyi ànu byanza muulu kùdìYe. Nudikù mwà kucyènza anyi?

Bitùùlùbitùùlù nè kalolo kònsò Yesù ùdi ùbìikila,
 Ùkubìikila wèwè nè mèmè,
 Nànsha twètù benzè mpèkaatù, Yèyè ùdi nè luse nè difwà dyà luse,
 Difwà dyà luse bwènù nwènù difwà dyà luse bwànyì mèmè.

Alùkila kumbèlu, alùkilà kumbèlu, (Dikàngile wèwè ànu mu nzùbu nè Kilistò mpindyewu.)

Nwènú bàdi bazengèle, alùkilaayi kumbèlu;
 Nè mwèndè mwònsò, nè kalolo kònsò, Yesù ùdi
 ùbìikila,
 Ùbìikila, Éyì ngènzàmpèkààtù wa yààya,
 alùkilà kumbèlu!

¹⁴³ [Katùpà kàà mukàbà wà mēyì munda mutupù—Muf.]... kacya ncítukù mwânjì kubwela mu òmwè dyà ku masangisha ètù à dyondopa aa kwònsò eku to, tùmonebi byanza byènu. Kacya ncítukù mwanji kwikala mu masangisha to? Abi's mbimpè. Ndi nè disànkà dyàbùngì dyà kwikalakù neenù kaaba aka.

¹⁴⁴ Mpindyewu, ncyèna ngàmba mündi mwondopi to. Ndi ngàmba nè Yesù kí mmufwè to, kàdi Ùdi nè mwoyi. Mémè ncyèna mwondopi to. Kakùtukù bwondopyanganyi to. Kilistò ùkaadi mumanè kukwondopa. “Ku mibùndàbùndà Yèndè wèwè wàkamana kwondopiibwa.”

¹⁴⁵ Kàdi ndi muswè kunùkonkakù cintu kampàndà nwènu bapyabàpyà bàdi balwè. Mpindyewu, pàmwàpa utu uya mu èkèleeziyà kampàndà. Bààbùngì bàà kunùdi bàvwà belè cyanza cyènu muulu ànu díbà adi abu, bàvwà beelè cyanza cyènu muulu bwà disambila, kùkaadi katanci. Nwènu kanùyì nè èkèleeziyà wa basungùle nànsha umwe to, tudi tunùjingila difika dilenga mu Branham Tabernacle emu, mwaba wùdi Mwanèètù munanga Orman Neville ewu, muntu wa difwànà dyà Nzambi udi kàyì ùlongesha cingà cintu to ànu bulelèlè, bwà mu Bible. Tudi tunùjingila difika dilenga ku bwobùmwe bwètù. Tudi ànu... Kí ndingumba to. Tudi ànu èkèleeziyà kaaba aka, bwobùmwe kampàndà. Twètù tudi ba-Méthodistes, ba-Baptistes, ba-Presbyteriens, beena Mpenta, ba-Luthériens, tudi bònsò. Tudi beena Kilistò bàdi bakunangè. Nènu tudi tulomba bwà nwasanganakù nè nwènu... Panwikalà kanùyì mwà kulwa mwab'ewu to, nùpetèku èkèleeziyà mwimpè mwikale kwènu kumbèlu, mwaba kampàndà, mwaba wùdibo cyà bushùwà bàyiisha Èvànjeeliyò, nè bwà nwamòna mwà kudìishiibwa kùdi Nyumà wa Nzambi.

¹⁴⁶ Mu nyùngulwilu mwònsò, mu nzùbu mònsò emu, dilòlòlò edi... Mukalenge Yesù yèyè mubiike ku bafwè, nè mémè mvwa munwàmbile Bulelèlè, díbà adi Nzambi mmwenzèjiibwe ku Dìyì Dyèndè, bwà kudìvwija nànkù. Nwamònu anyi?

¹⁴⁷ Kaa, kanùciinyi bwà kuCyèyemena to. Anyi aci cidi m'Bible, M'Bulelèlè, anyi Kacyèna Bulelèlè to. Cyòci kacyi Bulelèlè to, Ke mùseeswishanganyi mutàmbe bunène ukààdikù kacya mufùndiibwe, bwalu m'Museeswishe bààbùngì. Nkààdikù mwimàne, misangu yàbùngì, nè Koran mu cyanza cimwè nè Bible mu cìkwàbò, kumpàlà kwà ba-Mùzùlùmanyi, kàdi kwamba nè: “Umwe mmulelèlè nè mukwàbò ngwà mafi.

Nzambì udi Nzambì mulelèlè awu, àkulè.” Kùcìinyi to. Yèyè kààdyàkukulekelakù to. Yèyè kààdyàkukushiyakù to.

¹⁴⁸ Mpindyewu, Mukalenge Yesù, pàvwàYe pa buloba apa, byenzedi byàkenzàYe, bitùdi tufùma ku ditèèla ebi, Wàkalaya nè Yèyè neálwe cyàkàbìdi kumpàlà kwà ndekeelu wa cikondo nè neénzè bintu bìmwebìmwebè abi. Wàkamba nè Yèyè ùvwà mwà kucyènzela ku Èkèleeziyà Wendè. Mpindyewu, Yèyè wàkamba nè: “Mémè ndi Mwonji wà mvinyò, nwènù nudi matàmbà.” Mpindyewu, Mwonji wà mvinyò kawùtu wùkwàma mamuma to. Matàmbà ngatù àkwàma mamuma.

¹⁴⁹ Mpindyewu, cyòdi ciikàle mwonjì wà diwòji, nedikwamè mawòji. Cyòci ciikàle cibimbi, necikwamè bibimbi. Cyòci ciikàle mwonjì wà diwòji, newùkwamè mawòji. Wòwò mwikàle mwonjì wà tumuma twà mvinyò, newùkwamè tumuma twà mvinyò.

¹⁵⁰ Cyòci ciikàle mwonji wà mvinyò wà bwena Kilistò, newùkwamè Kilistò, Mwoyi wà Kilistò, byenzedi byà Kilistò. Nwamònu anyi? Dìbà adi, nyumà yètù yidi nè cyà kupèebwa bukolè kùdi cintu kampàndà.

¹⁵¹ Ndi nè disànkà dyàbùngì dyà kwikala munda Mwèndè, dilòòlò edi. Kanwèna bamanyè to, nwènù kasumbu kakesè kàà mikòòkò aku, mùshindù mwinè wùdìbi bìmfikisha ku didyùmvwa's, bwà kumanya kaaba aka nè, nkàadi nè bidimu makùmi ànaayi nè mwandamukùlù, muntu mukùlakàji. Kàdi ndi muyiishe mpindyewu kùkaadi bidimu makùmi àbìdi nè mwandamutekète. Makaanya àànyì àdi munkaci mwà kukòbama. Kàdi, kaa, ndi ngùmvwa nè ncicyenà nsongàalùmè mukesè uvwa nè ciibidilu cyà kunàya mààbì pambèlu pàapa mu mùsèèsù to. Kàdi kùdi cintu cìmwèpelè cìndi mumanyè bulelèlè, ndi musadidi Wendè. Mvwa mwà kuswà cyòci aci kutàmba byònsò bìndi mumanyè. Bwalu mbwìmpè kaayi bùdi cintu kanà cyònsò eci mwà kungenzela?

¹⁵² Ndi muteete kwikala nè meeji matòòke kumpàlà kwènù. Ndi muteetè bwà kwenza cyònsò cìmvwàku pàànyì mwà kwenza aci bwà kwikala nè meeji matòòke nè mwakàne nè mulelèlè, mu bwikadi bwènù nè mu bwikadi bwà Nzambi, bwalu ndi mumanyè nè Yèyè ùtu ùtùtábaleela dìbà dyònsò. Mpindyewu, bu mémè mwà . . .

¹⁵³ Ndi nnwàmbila mpindyewu. Diyiisha dikesè edi dilòòlò edi, ndi muteetè bwà kwimanyika kumpàlà kwà dìbà, kàdi ndi ndòmba bwà Nzambì àteekèku bikwàbò bìdi bìshààla abi mu mwoyi wènù. Lwijàkàjàayi! Lwijàkàjàayi! Lwijàkàjàayi! Pàtukàayi mu Baabùlòonà, nè lùkàsà nè mwènù mwònsò. Kanùshàadi mu byà pa buloba to. Umùkaayi mu lukutukutu alu. Pàtukàayi! Pàtukàayi mwab'ewu, badishikàmìne, nè Kilistò. Tàpulukaayi nè bintu abi. Bwalu kanwèna bamanyè nè ndìbà kaayi diikalà buloba ebu kabùyì mwà kwikala cìngà cintu to ànu lupwishì lushàalepù to, ànu magazè, nè buloba bwà kale

ebu butùdisha bushààle ànu tusùnsukilà. Bidi mwà kwenzeka kumpala kwà disangisha edi kujikadi, nè kî mbifwànyine kubèngangana nè Mifundu to nànsha kakesè. Ncifwànyine ànu kuuja Mifundu. Èvànjeeliyò mmuyiishibwe. Ke Mukenji wà ndekeelu wùlwalwà ewu.

¹⁵⁴ Mpindyewu, kanùkèbi bintu binène mu matùkù àcìlwalwà to. Àmèrikè ùkaadi mumanè kwenza mpèkaatù mupicishe ditùkù dyèndè dyà ngàsà. Ncyà bushùwà menemene. Nùcifundaayi mu Bibles yènu bwà nùjandulè nè ndi mubingè anyi ndi mupùile. Ùdi wènda ùpweka kwìnshi kwà cibàndilu mpindyewu kùkaadi bidimu bibidi.

¹⁵⁵ Billy Graham mmwambè, ku didyà dyèndè dyà mu dindà ànu àbidi àdi panshi aa. Wàkakwata Bible mwela muulu. Yèyè nè: “S’ki cipiminu ncyôci *eci*. Pòlò ùvwa ùya mu cimenga nè ùkùdimwisha muntu umwe mucima, wàlukila cidimu cìvwà cìlondà nè kùvwa makùmi àsàtù.” Yèyè nè: “Mèmè ndi mbwela mu cimenga ngenza ditàbulu, dyà bantu binunu makùmi àbidi bàdi bakùdimùne mucima, kàdi ngàalukila ngondo yisambòmbò kàdi ncìyi mwà kusangana pàmwàpa makùmi àbidi to.”

¹⁵⁶ Mbwalu kaayi ebu? Kùdi ànu mishipa bùngi kampànda mu dijiba amu. Kùdi ànu bantu bùngi kampànda bàdi Nzambi mumanyè kumpala kwà difukà dyà dyulu nè buloba, nè biikàle badyànjlà kulongolwela Mwoyi wà Cyendèlèlèlè. Pààbwelà wà ndekeelu awu, aci necikòse bwalu.

¹⁵⁷ Kùvwa ànu nyuunyi bùngi kampànda yàkabwela mu bwàtù amu, ànu nyama mishilèshilàngàne bùngi kampànda yàkabwela mu bwàtù abu. Kàdi ciibi kukàngiibwa, kùdi Nzambi, kàdi kushiyaci bakwàbò bònso pambèlu, nànsha mwàkateetàbo bwà kubwelamù amu.

¹⁵⁸ Nènku mulundà wanyi munanga, pawikalà kùyì munda to, bwelà mpindyewu mene, pàcidi Nzambi munkaci mwà kubiikila apa, bwalu biibi byà luse mbifwànyine kukàngiibwa, bwà bàà Bisàmbà byà bendè, pa díbà kanà dyònsò. Mpindyewu, nènku mpindyewu cindi ngèza, mpindyewu, neciikale nè... Cindi ngamba mpindyewu *eci*...

¹⁵⁹ Ndi mwakùle, nè mèyi àànyi, bu nè mvwa muiishe munda mwà mèbà nè mèbà, kacivwa mwà kuumvwija cyàbìbidi cyà díyi dimwèpelè dyà kùdi Mukalenge wetù munanga Yesù Kilistò nànsha. Mpindyewu, kàdi cindi muiishe, anyi ndi mwambe Bulelèlè anyi mashimi. Pìikalàbi nè ndi mwambè mashimi, Nzambi kàakwikala nè cyà dyenzamù to. Pìikalàbi nè ndi mwambè Bulelèlè, Nzambi nèimanè paanyimà pàà Díyi Dyèndè.

Nudi bambe nè mbùngi kaayi? Nudi baabànye twartà makùmi àtaanu anyi?

¹⁶⁰ Nènnùleejè bwà cinyi bidi bìkèngela bwà twètù kwabanya twartà, panùdi nè masangisha à dijingulula. Ncyèna ngamba nè Yèyè neàcyènzè to. Yèyè mmufwànyine kubènga kucyènzà.

Kàdi ndi muswè bwà nwênù kwikala nè meeji matòòke kùndi. Mbanganyi mwab'ewu bàdì baswè kubwela mu mulongo mpindyewu? Elàayi byanza byènu muulu, mu nzùbu mujimà, mwaba wònsò wunùdì awu. Muntu yònsò mu nzùbu emu udi muswè kubwela mu mulongo, elàayi byanza byènu muulu. Mpindyewu mbanganyi bàdì bafwànyine... Nganyi udi mufwànyine kwikala wa kumpàlà? Nwamònu anyi? Kwèna mufwànyine kucyènzà to. Bikèngela twàbanyè twartà, bwà kulama mu—mulongo.

¹⁶¹ Mpindyewu, mmwabànyè twartà makùmi àtaanu. Nènkù túbìikidilàayi ànu ku nseke yònsò, kuumukila ku mushikì wà twartà wàwa, nènkù aci necifile mpùngà kùdì muntu yònsò bwà kulwayè.

¹⁶² Mpindyewu, kî ncìdì cyènzekà *kaaba aka* to. Ncìdì cyènzekà *kaaba aka* aci. Nwamònu anyi? Kî nnè, kundenga mèmè to. Cidi nè, kuMulenga Yèyè. Mbanganyi bàdì bamanyè nè Dipungila Dipyadiyà, Mukàndà wà Ebèlù, mmwàmbè nè mpindyewu mene, nè: “Kilistò m'Mwakwidi Munène udi mwà kulengiibwa kùdì dyumvwa dyà mateketa ètù anyi”? Èè, mmunyi mùdì mufwànyine kumanya nè udi muMulengè? Ku nè, Yèyè ùdì wàndamuna, ànu mwàkenzàYe amu. PìikalàYe umweumwe awu makèèlèlè, leelù, too nè kashidi, Ùdì nè cyà kuDimwènesha ànu byà momùmwè nè mwàkenzàYe makèèlèlè nè kashidi. Pa nànkù, nudi numòna mukenji wà ndekeelu kùdì beena Yudà nè bakwàbò abu, mwàkacyènzàYe anyi? Mpindyewu eci ke cyà-...

¹⁶³ Bu Yèyè mwà kuDimwènesha mùshindù mukwàbò kanà wònsò, kupicila ku dīgumba, Yèyè's mmufwànyine kwikala kàyi mujaalàme to. Yèyè kacya kàtukù muDimwèneshile mu dīgumba to, bwalu kakùvwa dīgumba mu matùkù Èndè to. Yèyè wàkaDimwèneshila ku citàmbe-mfùkilu, bu mutwàfumu ku dyàmbe mu dindà emu, bu mufundu ku cimanu, dyandamuna. Yèyè ùdì umweumwe awu makèèlèlè, leelù, too nè kashidi. Nzambì ìkalè neenù mpindyewu.

¹⁶⁴ Yèyè nè: “Ùmwè too nè ku makùmi àtaanu.” Èyo. Nganyi udi nè kartà kàà disambila kàà nombà umwe, udikù mwà kwela ànu cianza cyèbè muulu cyanààna anyi. Tàngilàayi twartà twènu. Muntu kampàndà udi mu tulaalu, anyi ní mpenyi pònsò, kàdi kàyiku mwà kujuuka to, muntu nè muntu àtàngilè kartà kàà bantu bakwàbò. Kàdi ànu kartà kakesè cyanààna. Ndi ngèèla meeji nè etu katwèna nè fòtò wanyì pampàlà apu to, nànsa nànkù. Kàdi ànu kartà kakesè kèètù kàà pàtupù aka. Nombà umwe, mwaba wònsò wùdì awu. [Mwanèètù wa balùme kampàndà ùdì wàmbe nè: “Ànu apa mene.”—Muf.] Èyo. Udikù mwà kujuukila ànu kuulu mwaba wùdì awu anyi, mukalenge. Nombà ibidì, udikù mwà kwela cianza cyèbè muulu anyi. Inàbànzà udi *apa* ewu. Nombà isàtù, udikù mwà kwela cianza cyèbè muulu. [Katùpà kàà mukàbà wà mèyì munda mutupù.]

165 Tudi beenyi. Ewu mmusangu wètù wà kumpàlà wà ditwilangana dībà adi, mu mwoyi emu, mûndi ncinka. Dībà adi, Mukalenge Nzambi ngudi mutumanyè twètù bônso bàbìdì. Yèyè ngudi mumanyè maalu èbè ônsò, nè Yèyè ngudi mumanyè byônsò bìdì bîntàngilà mèmè. Kàdi bu Yèyè, mu musàngéelu Wèndè, mufwànyine kukumbana...

166 Bu mèmè mwà kukwambila nè: “Kaa, mukalenge, udi usaama. Nè ndi... Neŭmvwè bîmpè.” Udi mufwànyine kwikala nè bukenji bwà kwela aci mpatà. Batèeleji abu mbafwànyine kwikala nè bukenji bwà kwela kabavu, bwalu abu’s. Cyà bushùwà. Udi wèwè ànu nè òyì dyànyì.

167 Kàdi bu Nyumà Mwîmpè mwà kulwa kumwambila cintu kampàndà cidiye mwênzè, cintu kampàndà cîndi mèmè nciyi mumanyè bwalu bwàci nànsha bùmwe, cîtù cyenzeka, yèyè neàmanyè nè aci ncilelèlè anyi to.

168 Dībà adi pîikalàbì nè Yèyè mmumanyè cyàkadiku, cyà bushùwà, pîikalàbì nè ncyà bushùwà, Yèyè ùdi mwà kukwambila cîikalàku, nè necîikalè cilelèlè.

169 Bivwa bikèngela bwà wèwè kwitabuuya aci, Màndamù Cox, kí mmwômò anyi? Màndamù Cox udi musòmbè pààpa wàwa, ndi mfùma ku dimumòna, wa ku Kentucky, lwà apa nùku. Awu’s m’Màndamù Wood...mwaba kampàndà mu èkèleeziyà emu, mamwèndè. Kànsèrè kamanè kumudyà mpàla yônsò, munda emu.

170 Mwawa ngenda mpweka ngùumukila ku meetu à ku nord. Mukàjàànyì kumbiikilayè, wàmba nè: “Kacya ncitukù mwanji kumòna muntu nànsha umwe mufwè naayi kacya bàndela to, bu—bu Màndamù Wood.” Kàdi’s Mukalenge nè Màndamù Wood mbalundà bàànyì bàà katàpùlā-katèèkà. Ke mèmè kuya kùdì inàbànzà awu, kwalukila nè EMU MMÜDÌ MUKALENGE WÀMBA. Kànsèrè aku kààkafwà.

171 Mwaba awu, mukàjì udi musòmbè mwaba awu awu, kàdi mbikolè bwà kwamba cìdì...Udiku mwà kujuukila ànu kuulu cyanaàna anyi, Màndamù Cox, bwà bantu kumònabò. Luseke lwèndè lwònsò lwà dyùlù alu, ludyà lwònsò kùdì kànsèrè, kabwelè too nè mu mèsù. Kùdimukà bwà batèeleji bàkumònè lwà paanyimà pààpa. Kànsèrè.

Ùtu misangu yônsò ànu mubingè. Kacya kàtukù mupîlle to.

172 Mpindyewu, bu Mukalenge Nzambi wetù mwà kubuulwila mwanèètù wa balùme ewu, yèyè ikalè mulumbulwishi, bu Mukalenge Nzambi wetù mwà kumubuulwila cidiye mulwilè kaaba aka. Anyi, cintu kampàndà mwàkenzelàYe mukàjì awu ku...Anyi, bu mùvwàYe mufwànyine kwamba bu mwàkambilàYe Filipò, pààkamusanganà Natànàèlā...anyi Natànà...Filipò kusanganaye Natànàèlā. Nè neàcibuulùlè, nenwitabuujè bônso bwènù anyi, nwènù bônso nenwitabuujè anyi? Muntu awu yèyè—yèyè mumanyè nè ncyèna mumanyè

kantu nànsa kàmwè pa bwalu bwèndè to; nè ndi nè byanza byànyì byela muulu, ncyèna mumanyè kantu nànsa kàmwè pa bidì bimutàngila to. Mmwele byanza byèndè muulu nè, ncivwa mumumanyè to, anyì yèyè kî mmummanyè to. Nènkù bu Mukalenge mwà kucibuulula, nwènù bônso nenùciitàbè, kî mmwômò anyì? Mbanganyì? Elàayi byanza byènù muulu, bwà ngàäfika ku dimòna. Mpindyewu, Mukalenge ànùbènèshè.

¹⁷³ Mpindyewu, mukalenge, ndi mwimàne ànu kaaba aka, mwindile bwà kumòna ciikalàYe mwà kungambila, pa nànkù wèwè ke wakòsa bwalu abu. Nènkù muntu yèyè mwà kutàngila, muntu mulùme ewu ùdi nè mèsù mabwita, pa nànkù nudi numòna nè kî ncifwànyine kwikala lubùku to. Shààla wèwè ànu nè mèsù èbè mabwita. Bu Mukalenge wetù Yesù. . . Bu Yèyè mwà kucibuulula, netwikalè nè kusàkidila kùdiYe.

¹⁷⁴ Kàdi muntu udi mwimàne kumpàlà kwànyì ewu, cidiye mulwilè kaaba aka aci, mbwalu bwà nyumà bùdiye ùjinga bwà bàmusambidilè. Aci's ncilelèlè. Ní ncyà bushùwà, elà cyanza cyèbè muulu bwà bantu kumònabò. Mpindyewu nudi nwitabuuja anyì? Kacya ncitu mwànji kumumònakù to kacya bàndela, kàdi's ke cyòci eci. Cintu kampàndà cidi cìmutàcisha mu meji. Mpindyewu, pàndi ntàmba kwakula nendè, byàbùngi bìvwa mwà kwambiibwa. Mpindyewu ikàlaayi nè kaneemu.

¹⁷⁵ Cyàkenzà Mwanjèlò awu ncinyì? Ùvwa mukomè nyimà Wendè, nè kwambaYè nè: "Sarah wàsekì bwà cinyì?"

Yèyè nè: "Ncyèna musekèku to."

Yèyè nè: "Kaa, èyowà's, udi musekè." Bwalu, ùvwa nè bwôwà.

¹⁷⁶ Mpindyewu bu batèèleji mwà kutùngunuka nè kutèèleja dìyì dyànyì, ku bipwidi. Muntu ewu nyèwù umwèka bu udi wenda ùùmuka kùndi. Ndi mmòna muntu mukàji mwimàne kuulu. Ke cintu cyà mushinga cidi muntu mulùme ewu mulwilè kaaba aka. Mbwa mukàjèndè, nè yèyè kèna nendè kaaba aka to. Nè ùdi nè disaamà dyà bàna bakàji, disaamà dyà bainàbànzà, nè ùdi nè lutàtù lwà nyimà wendè awu. Aci mbulelèlè.

¹⁷⁷ Kwèna wa mu cimenga eci to. Udi wa mu cimenga cikwàbò, cidi cìbiikidiibwà nè Marysville. Aci's ncilelèlè. Mpindyewu alùkilaaku kwèbè kumbèlu ùkacisangànè mùshindù wùdi mucitàbùùje awu. Nebiikalè mùshindù awu, mu Dîna dyà Mukalenge. Nzambi àkubènèshè. Mùshwàlà awu, kwàkukèngela bwà kumutentekelawù to, uvwa naawù mu cìbòmbò mwèbè amu bwèndè yèyè, kàdi kwàkwikala naawù dijinga to.

¹⁷⁸ Ndi mukumanyè cyà bushùwà. Ncyèna mumanyè dîna dyèbè to. Kàdi wèwè udi muntu mukàji uvwa mwimàne lwà ku ciibi cyà paanyimà pààpa, dîngà ditùkù, divwà Mwanjèlò wa Mukalenge mulwè kùndi, dîbà dyùvwà mulwe musangu wèbè wàkumpàlà mu tabernacle emu, nè kusokolola cintu kampàndà cìvwà mùnsokòntù wà menemene ewu. Nè wèwè kwondopiibwa, ku kànsère. Ncyà bushùwà. Kàdi ncyèna nè cingènyingenyi nànsa

cikesè cyà cidi cikutàcisha mpindyewu to. Ncyèna mumanyè to. Aci's udi mumanyè. Ncyènakú nè cingènyingenyi nànsha cikesè cyà cidi cikutàcisha to. Kàdi, bu Mukalenge mwà kucibuulula, neucitabè anyi? [Mwanèètù wa bakàji awu ùdi wàmba nè: "Eyowà."—Muf.] Ndi. . .

¹⁷⁹ Kwèna kaaba aka bwèbè wèwè mwinè to. Udi kaaba aka mbwà mwànà kampàndà. Nè yèyè mwànà awu ùdi mu lutàtu. Lutàtù lùdi lùsanganyiibwa mu mwongo. Byenze bu, kèna mwà kujuuka kuulu to, anyi cintu kampàndà cyà mùshindù awu. Nè ndi mmòna baledi bàà mwànà awu, nè lùnzàadi. Mbeena Kàtòlikè. Nènkú babàka bàbidi bakùlumpè, mùdibi, baakakwàbò mbeena Kàtòlikè, bòbò pààbò. Nè wèwè udi mwimàne bwà mwànà awu. Angàtà mùshwàlà wèbè ùkawùtentèkè pambidi pèndè. Kwèdi mpatà to, udi mwà kupeta cyùdi ulòmba aci. Mpindyewu itàbùùjà nè mwoyi wèbè wònsò.

Udi witabuuja anyi?

¹⁸⁰ Ngèèla meeji nè inàbànzà ewu mmwenyi kùndi. Katwèna bamanyàngàne to, kàdi Mukalenge Yesù mmutùmanyè bònsò bùbidi bwètù. Mpindyewu cimfwànyì cipwàngàne ncyòci eci. Cimfwànyì cipwàngàne cyà Yone Munsantu 4 ncyòci eci. Mukàji wa bafìike, mulùme wa batòòke; mu ditùkù adi, ùvwa mwena Sàmaalèyà, nè mwena Yudà, bisà bibidi byà bantu. Yesù wàkamumanyisha, lùkàsàlùkàsà nè, kakùvwa dishiilangana to. Tudi bònsò bifùkùibwà byà Nzambi. Ditùnga ditùdi basòmbèlemù edi, ndidi dishintulula diikala dyètù, kadyènamù nè bwalu nànsha bùmwè to. Nzambi ùvwa muswè bwà cisàmbà Cyèndè ciikale mùshindù awu. Wàkenza muntu mutòòke, mufiike, mufikùlùke, wa kàlaabi, mukùnze. Wàkabènza mùshindù awu. Aci ndyenza Dyèndè. Nè Yèyè mmutùnangè bònsò. Kàdi cimfwànyì cipwàngàne ncyòci eci, bantu bàbidi bàtu kacya kabàyiku bânji kutwilanganakù kwònsò eku, nè wetù musangu wà kumpàlà, bisà bibidi bishiilàngàne.

¹⁸¹ Mpindyewu, ndi njingulula nè wèwè udi mwena kwitabuuja. Udi mwena Kilistò, bwalu nyumà webè mmwitàbìibwe bimpè. Nènkú Mwanjèlò munène wa Nzambi awu kàvwakù mufwànyine kwakidila cintu nànsha cimwè cìvwà cibì to. Nànsha kakesè. Udi mumòne fòtò udi kuulu wàwa, Mwanjèlò udi pa fòtò awu, Bukènkè bùdi kumutù kwànyì mwaba wùndi mwimàne awu? Ke cidi cyènza nè ùdyumvwè mùdi udyumvwa mpindyewu amu. Bùdi ànu munkaci mwà kukupwekela pambidi.

Anji indilà kakesè, Mwanèètù wa bakàji Gertie.

¹⁸² Cidi cìmwèka bu cintu kampàndà, ncyèna mwà kubàkula inàbànzà awu bimpè menemene to. Eyowà. Mukàji ewu ùdi ùsaama dinyùnguluka dyà mutù. Ùdi ùsaama dinyùnguluka dyà mutù. Ùdi ùmacisha bintu. Ncyà bushùwà. Nè pashiishe udi nè lutàtù lwà nyumà lùdi uteeta bwà kujikija, bwalu uvwa munkaci mwà kulùsambidila kùkaadi cikondo kampàndà. Aci's ncilelèlà.

Kàbìdì udi nè binyòka. Ndi nkumòna utàta bwà kujuuka mu bulààlu bwèbè, nè lujòòkò, nangàngà mu dindà. Udi nè cintu kampàndà cipampàlāmùke mu mwongo wèbè, kàbìdì, dĩaamà dyà mwongo. Aci cìdì EMU MMÜDÌ MUKALENGE WÀMBA.

¹⁸³ Udi witabuuja nè mèmè ndi mupròfetà wa Nzambì anyi? Udi witabuuja nè Nzambì umweumwe uvwa mumanyè Simonà awu mmufwànyine kukumanya anyi? Bu Nzambì mwà kubuulula aci, necikuvwiye mwena kwitabuuja wa dikàndà, bwà wàpeta cyùdì upeta aci anyi? Bàtu bàkubùikila nè: “Nanny.” Nè dīnà dyèbè dyà munda n’Johnson. Nènku udi musòmbèle mu New Albany. Alùkilaaku kwèbè kumbèlu ùsàngalè, mu Dīnà dyà Mukalenge Yesù. Amen.

Itàbùùjà ànu cyanààna.

¹⁸⁴ Katwèna bamanyàngàne muntu nè mukwèndè anyi, inàbànzà? Tudi beenyi. Ànu bwà—ànu bwà bantu bààmònakù, udikù mwà kwela ànu cyanza muulu cyanààna, bwà kwamba nè: “Katwèna bamanyàngàne to. Ànu...” Mpindyewu Mukalenge Nzambì mmutùmanyè twètù bònsò bàbìdì. Nènku bu Yèyè mwà kufila dilòmbà edì, newikalè nè disànkà bwà bwalu abu anyi?

Mpindyewu bàmwè bàà kunùdì mbabangè kwitabuuja.

¹⁸⁵ Mpindyewu, kùdì ànu kutùngunuka nè kumweka muntu mulùme mutòòke kumpàlà kwà mukàjì ewu.

¹⁸⁶ Mmuntu mulùme udi musòmbè ànu mwaba awu mene. Udi nè... Bìdì ànu bìmpè, shààla wèwè ànu mwaba wùdì awu. Udi nè dĩaamà dyà twonyi. Udi nè dĩaamà dyà nyimà. Nè udi nè dĩaamà dyà cìfù. Ncyà bushùwà. Mpindyewu ndàaku, mwikale witabuuja, nè kabyàkukutàcisha kàbìdì to.

¹⁸⁷ Itàbùùjaayi ànu cyanààna. Ndi ngèèla diitabuuja dyènù kadyòmbò bwà kuciitabuuja. Mbanganyi bàdì bàciitabuuja nè mwoyi wènù wònsò? Èyo, dībà adì tàngilàayi nè nwikalè nè mwoyi.

¹⁸⁸ Bu Mukalenge Nzambì wetù mwà kubuulwila mukàjì ewu udi mwenyi ànu wetù wa menemene ewu kùndì, nè tudì nè byanza byètù byela muulu bìleeja nè kacya katùtu batwilàngànekù kumpàla, ku dyètù dimanya to, nènku bu Mukalenge Nzambì wetù mwà kubuulwila mukàjì ewu nè kwenza cintu cìmwècìmwè cyàkenzàYe aci, bu mukàjì wa ku... mukàjì wa beena Sàmaalèyà awu, nudi bònsò mwà kwitabuujakù nè mwoyi wènù ònsò dībà adì, aci necikosè bwalu abu kashidì, kunùdì anyi?

¹⁸⁹ Nwamònu’s, ndi nè disangisha dilwalwà. Bìkèngela ngùùmukè maaalabà. Nènku bìkèngela nye ku Virginie, nè ku disangisha dinène dilwalwà. Ncyèna muswè kutàmba kuzengela bikolè to, pàndì mwimàne mwaba ewu. Èyo, nèngàngate dībà, ànu bwà katanci kakesè cyanààna, nè mukàjì ewu. Nè nudi nwitabuuja.

190 Mukàjì ewu nànsa yèyè mwikàle nganyì, ùdi nè mîdimà yà mmwènekèlu mubì be yimulonda. Kaa, cintu's—cintu's ndibungama. Udi mufùme ku dipeta lutàtu kampàndà. Udi mujimìje mwànà, mwànà wa mu dibòkò. Ncyà bushùwà. Nè cikwàbò cintu, udi mutàcishìlbwe nè disaamà dyà bânà bakàjì, disaamà dyà bainábànzà, nè disaamà dyà nyimà. Nè wèwè kàbìdì udi nè cintu kampàndà cyà mùshindù kampàndà cìdì cikwenzekela, byenzè bu udi uminyina. Kaa, ciseki. Ncyà bushùwà. Kwèna wa mu cimenga eci to, nànsa mene. Udi musabùke musùlù, bwà kulwa mwab'ewu. Udi mufùmìne ku Louisville. Utu musòmbèle ku nombà kampàndà, ùbìikidiibwa nè: 1754 Mùsèèsù wà West Oak. Dìna dyèbè m'Margaret Quinn. Eyo.

191 Mukalenge Nzambì, Mufùki wa maulu nè buloba, pèeshakù mukàjì ewu cidiye ùjinga, bwalu ndi ndòmba bwà mwena lukunà ewu àmuumùkè, mu Dìna dyà Yesù. Amen.

192 Nzambì àkubènèshè, inábànzà. Kwèdikù kàbìdì mpatà to. Ndààku ùpetè mpindyewu cyùdì mulòmbè aci.

193 Udi witabuuja nè mwoyi wèbè wònsò anyì?

194 Wetwàwu, mukalenge? Ewu's mmusangu wètù wà kumpàlà wà ditwilangana, ngèèla meeji. Udi witabuuja nè Mukalenge Nzambì wètù ùdi kaaba aka bwà kukumbaja nè kukupèesha bintu byùdì ujinga anyì? [Mwanèètù wa balùme awu ùdi wàmba nè: “Èyowà, ndi ngiitabuuja. Ndi mumanyè nè Yèyè ùdi kaaba aka. Ndi mwà kuMumòna.”—Muf.] Ndi ngàanyisha dikima dyèbè. Nènkù udi kaaba aka bwà cintu cyà mushinga. Udi muswè kulekela dinwà dyà maalà nè dinwà dyà mfwankà. Èè, mbimanè kukushìla kaaba mpindyewu. Ndààku, nè ditalala dyà Nzambì diikalè neebè nè dikwitàbùùjìjè. Nzambì ikalè neebè.

“Bu wèwè mwà kwitabuuja, bintu byònsò bìdi mwà kwenzeka.”

195 Udi muswè kutàpuluka nè disaamà dyà nyimà adi anyì? Pwekà kuntu kwàka, wenda uMutumbisha, nènkù neùtapulukè naadi. Ndààku ànu cyanàànà, mwikàle uciitabuuja, nè mwoyi wèbè wònsò.

196 “Bu wèwè mwà kwitabuuja,” mùdì Bible mwambè. Ikàlaayi nè kaneemu kààbùngì. Itàbùùjaayi nè cìdì Nzambì wènza aci m'Bulelèlè.

197 Ndi mukumanyè. Nèngiikalè ànu mwà kukusambidila. Ndi mumanyè lutàtu lwèbè.

198 Mukalenge Nzambì, ikàlàku nè luse kùdì mukàjì ewu nè filakù dilòmbà edi, bwalu ndi ndòmba nùnkù mu Dìna dyà Yesù. Amen. Ncyèna mvùluka...Dìna dyèbè m'Baker anyì? [Mwanèètù wa bakàjì awu ùdi wàmba nè: “Èyowà's, mukalenge.”—Muf.] Ncyà bushùwà. Ndi—ndi mvùluka mpindyewu. Nzambì àkubènèshè. Tùngunuka wèwè ànu nè

kuya kumpalà mpindyewu nè ùMwitàbùùjè nè mwoyi wèbè wònsò. Èyo.

¹⁹⁹ Ncyèna mukumanyè to, inàbànzà. Tudi beenyi. Ncyà bushùwà. Udi muswè kudyà cyàkudyà cyèbè cyà dilòlò aci, kutàpulukà nè disaamà dyà cifù adi, cyûjà cyûvwà naaci dîbà dyònsò aci anyi? Ndààku, ùkadyè, dîbà adi, nè Yesù Kilistò ùdi ùkusàngaja.

²⁰⁰ Ndi mukumanyè bulelèlè. Nè ndi mumanyè cidi lutàtù lwèbè. Kwèna mumanyè—kwèna mumanyè nè ndi mucimanyè to, kàdi, ndi—ndi mucimanyè bulelèlè. Pa nànkù bu mùdibi nè utu ulwa ku tabernacle eku, ncyàkucyamba to. Kàdi binyòka nebikuumùkè bu wèwè ànu mwà kuciitabuuja. Nda mutàngile kumpalà. Nzambi àkubènèshè.

²⁰¹ Twàmbààyi nè: “Twasàkidila Nzambi.” [Disangisha didi dyamba nè: “Twasàkidila Nzambi.”—Muf.]

²⁰² Udi mubindùlùke, wèwè pèèbè. Udi nè disaamà dyà cifù dikutàcisha. Udi witabuuja nè Mukalenge Yesù neàkusàngajè anyi? [Mwanèètù wa bakàji awu ùdi wamba nè: “Ndi ngiitabuuja.”—Muf.] Nànkù ndààku, nè ditalala dyà Nzambi diikalè pambidi pèèbè. Ndi muswè ànu kukutentekela byanza cyanààna, nè kwitabuuja nè mwoyi wètù wònsò nè, Nzambi neàcyènzè.

²⁰³ Ndi mwenyi kùdi, ngèèla meeji, inàbànzà. Udi mummanyè anyi? Utu ulwa mwab'ewu mu èkèleeziyà emu anyi? Utu ulwamù. Kacya ncitukù mwànji kukumòna to. Mu bushùwà bwà bwalu, bantu bààbùngi menemene bàtu bàlwa. Èyo. Ndààku, mwikàle witabuuja, nè disaamà dyà bàna bakàji adi nedikushiile kaaba, disaamà dyà bàna bakàji dyûvwà naadi adi. Udi witabuuja anyi? [Mwanèètù wa bakàji awu ùdi wamba nè: “Èyowà.”—Muf.] Èyo, nànkù ndààku, nè Nzambi neikalè neebè nè neàkukwàcishè, ndi mutwishibwe.

²⁰⁴ Udi witabuuja anyi, mukalenge? Udi witabuuja nè Mukalenge neùmushè dipapakana adi kùdi, nè kukusàngeeja, binyoka abi anyi? Ndààku wàlukile kuntwaku, wenda uMusàkidila nè uMutùmbisha bwà cyòci aci, pashiishe neùsangalè.

²⁰⁵ Udi mutàcishibwe nè disaamà dyà dibinduluka, kî mmwômò anyi, inàbànzà? Aci ndibinduluka dyà mu mutù. Udi wenda ucyòka be, udi ùsaama disalala dyà mubidi nangàangà mu mapingaja. Nànsha Sàtaanà mwinè mmukwambile nè neùjimijè lungènyi. Ncyà bushùwà. Kàdi mmashimi. Neùmvwè bimpè. Kî ncìngà cintu to ànu cikondo cyà mwoyi cyùdi ubwelamù. Cikaadi ndiimana dyà dimòna dyà cijila. Mukàji yònsò ùdi nè cyà kufika ku cyòci aci. Kàdi neùsangalè mpindyewu. Udi witabuuja dîyi dyànyi anyi? Nànkù ndààku, ùsàkidile Nzambi, nè wimbà misambu nè ucyònkómoka, nè ùsangalè.

²⁰⁶ Èyo, inǎbǎnzà. Ndi mwenyi kúdi, mémè pàànyì. Cintu cyà pabwàci, pàngǎmwambìdì aci, ncikumùke díbà ànu òmwèdimwè adi, bwalu aci menemene ke civwà lutàtù lwèbè, dibìnduluka. Mpindyewu kwata njila ndàaku, nè witabuuje nè mwoyi wèbè wònsò, nènku neǔmvwè bímpè. Amen. Ndàaku witabuuje nè mwoyi wèbè wònsò.

²⁰⁷ Ndi mukumanyè, inǎbǎnzà. Ndi mumanyè mpàla webè, kàdi ncyèna... Udi witabuuja nè Nzambi neàkwondòpè anyi? Ndi mumanyè mpindyewu nè wèwè udi nganyì. Wèwè udi inǎbǎnzà kampàndà utu ulwa mu tabernacle emu. Udi witabuuja nè Nzambi neàkwondòpè anyi? Lekèlaakù ànu nkusambìdìlè cyanààna.

²⁰⁸ Mukalenge Nzambi, Mufùki wa maulu nè buloba, òndopèku mukàji ewu, ndi ndòmba, mu Dìna dyà Yesù. Amen.

²⁰⁹ Kwèdikù mpatà to. Ncyèna mwà kuvùluka dìnà dyà mukàji awu to, kàdi ndi mumanyè nè yèyè... .

²¹⁰ Kàdi bishi bwà nwènù bàdi mu batèèleji emu aba? Nudi nwitabuuja anyi? Mpindyewu sòmbaayi bapùwe viiviivi menemene. Ikàlaayi nè kaneemu kàà menemene. Mu elu luseke *elu*, muntu kampàndà. Ndi ngèèla diitabuuja dyèbè kadyòmbò, mu Dìna dyà Yesù Kilistò, bwà kwitabuuja eci.

²¹¹ Mukàji wa bafike mwelè byanza byèndè muulu, kuntu kwàka. Udi witabuuja anyi, inǎbǎnzà, nè mémè ndi musadidi wa Nzambi? [Mwanètù wa bakàji awu ùdi wamba nè: “Èyowà’s, mukalenge.”—Muf.] Bu Nzambi mwà kunsokolwela cidi lutàtù lwèbè, neùcitàbè anyi? [“Èyowà’s, mukalenge.”] Udi muswè disambila bwèbè wèwè mwinè nè mwànà mukesè wa bakàji awu. Bwà mèsù èbè, paùdi musòmbè mwaba awu apu. Ncyà bushùwà. Tentèkèlè mwànà awu cyanza, nè itàbùùjà nè mwoyi wèbè wònsò.

²¹² Mukalenge Nzambi, ndi ndòmba bwà bàcyàkìdìlè, mu Dìna dyà Yesù. Amen.

Udi witabuuja anyi?

²¹³ Ke Mwanjèlò wa Mukalenge ewu mwimàne ku luseke lwà muntu wa nsuki mifike ewu. Ndi—ndi ngiitabuuja nè yèyè ùtu ùlwa mu èkèleeziyà emu, nànsha nànkù. Ncyèna mutwìshìibwe to. Mukalenge, mémè mukumanyè, ncyèna mumanyè cidi cikutàcisha to, ànu Nzambi mwà kucibuulula. Kàdi nluse Lwèndè lwimàne kaaba aka. Nè wèwè udi nè—nè cyùjà ku dikàsà, dikàsà dyà dyàbakàji. Ncyà bushùwà. Diitabuuja dyèbè—dyèbè ndilenge cintu kampàndà.

²¹⁴ Kàdi bishi bwènù nwènù, mu luseke elu, nudi nwitabuuja anyi? Ikàlaayi nè diitabuuja, díbà adi. Kanwèdi mpatà to.

²¹⁵ Mwab’ewu, inǎbǎnzà udi musòmbè apa ewu mwasè cifulu cifiike, muvwàle binetè. Udi nè kartà kàà disambila anyi, inǎbǎnzà? Ànu lwà paanyimà pàà mwànà mukesè wa balùme

awu apu, ku ndekeelu kwà mulongo, wêwè! Udi nè kartà kàa disambila anyi? Kwêna nè kartà kàa disambila to. Udi witabuuja nè mêmè ndi mupròfetà wa Nzambi anyi? Bu Nzambi mwà kunsokolwela cidì lutàtù lwèbè, nèucitàbè dibà adi anyi? Udi nè disaamà dyà mwoyi. Udi musòmbe ku luseke lwèbè awu's mbàyeèbè, nè ùdi nè disaamà dyà mijilu. Mpindyewu ndààku wìtabuuje.

Nganyì udi uMwitabuuja?

216 Kàdi bìshi bwà muntu mufilke udi musòmbe apa ewu? Udi witabuuja anyi, mukalenge? [Mwanèètù wa balùme awu ùdi wàmba nè: “Èyowà's, mukalenge.”—Muf.] Udi witabuuja nè mêmè ndi musadidi Wendè anyi? [“Èyowà.”] Udi ujinga disambila, kì mmwòmò anyi? [“Èyowà.”] Bu Nzambi mwà kumbuulwila, kuumukila kùndì mêmè kulwa kunùdì, nudi nwitabuuja nè Yèyè...bwà nè nudi mwà kuciitaba anyi? [“Èyowà.”] Udi nè disaamà dyà mutù wà kapàla. Nè udi nè mpùtà. Ncyà bushùwà.

217 Bishi bwà yònsò wa kunùdì aku, nudi nwitabuuja anyi?

218 Kùdì mukàjì mukwàbò wa bafiike ànu lwà paanyimà pàa inàbànzà udi paanyimà apa ewu. Udi nè cyanza cyela muulu, mwanèètù wa bakàjì. Udi muswè cintu kampàndà cyà kùdì Mukalenge anyi? Udi witabuuja nè mêmè ndi musadidi Wendè anyi? Ndutàtù lwà díyì dyà mukana, ke cyùdì usaama. Ncyà bushùwà. Udi witabuuja nè Yèyè wàkwondòpi anyi?

219 Ànu kuumukila ku wêwè aku, mmutàngile ku luseke, ànu kuumukila kùdì aku lwà ku ndekeelu kwà mulongo aku; lwà ku bantu batwè ku ùmwè, bàbìdì, bàsàtù, bànaayi, bàtaanu, paanyimà pààpa. Udi nè lutàtù lwà kamina-bidyà. Udi witabuuja nè Nzambi neàkusàngàje anyi?

220 Kàdi bìshi bwà lwà paanyimà apa? Muntu udi ku ndekeelu kwà nkwasà awu, ànu lwà paanyimà apa mu mulongo emu. Udi nè cyùjà cyà mu dila. Ncyà bushùwà, mukalenge. Udi witabuuja nè Nzambi ùdi ùkwondopa anyi? Nànkù juukila kuulu ùcitàbè, mu Dìnà dyà Mukalenge Yesù.

221 Nzambi àkubènèshè. Kacya ncitukù mwânjì kukumòna to. Wêwè udi mwenyi kùndì. Kàdi Nzambi mmukumanyè.

222 Nudi nuciitabuuja anyi, muntu nè muntu wa kunùdì? Nudi nwitabuuja nè Mwanjèlò umwèumwè wa Nzambi wàkalwa kùdì Abraham awu, mu luse, Wàkamanya minsokòntù yà meeji à Sarah awu, yèyè umweumwe wàkiimana pa buloba nè kumanya maalu masokome à mu meeji awu, kanwènaayikù nwitabuuja nè Yèyè ùdi kaaba aka mpindyewu anyi? Nzambi umweumwe awu, kumpàlà menemene kwà buloba kwoshikabù cyàkàbìdì mu dibùtuka, kanwènakù nwitabuuja nè Yèyè ùdi kaaba aka anyi? Dibà adi tùMwitàbè. TùMwitàbùùjaayi. TuMwangàtaayi bu mwondopi wetù, mpindyewu mene. Mbanganyì bàà kunùdì bìikalà mwà kwitabuuja aci?

223 Mbanganyi bàà kunùdì aku bàdì biitabuuja cyà bushùwà? Elàayi byanza muulu. Mpindyewu, tentèkaayi, pwekèshaayi byanza byènù.

224 Bible mmwambè nùnkù: “Bimanyinu ebi nebifilè aba bàdì biitabuuja.”

225 Tentèkèlàngànaayi byanza muntu nè mukwèndè, dibà adi, panwikalà beena kwitabuuja. Udi usambidila muntu udi ku luseke lwèbè awu. Nè udi ku luseke lwèbè awu, àkusambidilè yèyè udibò bàsambidila awu. Muntu nè muntu wa kunùdì, sambidilàngànaayi muntu nè mukwèndè mpindyewu, mwaba kanà wònsò mu nzùbu emu. Ndi ngèèla diitabuuja edi kadyòmbò.

Inàbànza wàwa udi nè disaamà dyà cyàdì, pwaku mwoyi bwalu abu. Udi mwondòpiibwe.

226 Wèwè udi nè disaamà dyà mpàcì wa menyì, musòmbè mwaba awu, mukalenge, ujuuka munda mwà bufùkù. Pwaku aci mwoyi. Kabyàkukengela bwà wèwè kucyènza kàbidì to. Nzambi àkubènèshè.

227 Ndi nnwèla kadyòmbò bwà kwenza cyenzi cyà kwitabuuja. Nudi nucyènza anyi? Nànkù sambilaayi, muntu nè muntu wa kunùdì, mu wènù mùshindù sungasunga. Tentèkèlà muntu kampàndà byanza nè ùsambidilè muntu kampàndà udi ku luseke lwèbè awu, pàndì nnùsambidila nwènù bònsò apa.

228 Mukalenge Nzambi, Mufùki wa maulu nè buloba, mfùkyamukele wa Mwoyi wà kashidi, mufidi wa dipà dímpè dyònsò, tumaakù Nyumà Webè mpindyewu mene pa cisàmbà eci.

229 Ndi mpiisha byenzi byà dyabùlù, bwalu dyabùlù mmwediiibwe patòoke. Sàtaanà, kwèna mwà kushàala mubàlamè kàbidì ntàntà mule to. Diitabuuja dyàbò didi dibànda, nè bàdì nè byanza byàbò bitentekelangana muntu nè mukwèndè. Kàdi ndi nkwela kadyòmbò, bwà nè udi mujimje mvità, nè cilumbulwidi cikaadi pabwìpì. Pàtukà munda mwàbò, mu Dìnà dyà Yesù Kilistò. Pàtukà munda mwàbò, mu Dìnà dyà Yesù.

230 Nudi baMwitàbùje anyi? Elàayi byanza byènù muulu nùMupè butumbi bwà dyondopiibwa dyènù. Pawikalà mucibùkile panshì, juukilà kuulu; Kilistò udi ùkusàngaja. Pawikalà mulèma, mwikalè nè byanza byèbè nè bulèma, byele muulu; kwàjikì.

Mukàjì mucibùkile panshì nyèyè ewu, mwimàne kuulu.

231 Mukalenge atumbè's we! Twàmbàayi nè: “Mukalenge atumbè,” bantu bònsò. [Disangisha didi dyàmba nè: “Mukalenge atumbè!”—Muf.] Amen.

Mwanèètù Neville. 

58-0309^E Èkèleeziyà Neàye
Kumpàlà Kwà Dikènga Dinène Anyi?
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandalà, kulamiibwa mu cikâlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org